



杜詩分類卷之二

五言古

述懷類

述懷

公自賊中竄歸鳳翔至德二載夏拜拾遺

後作

去年潼關破，妻子隔絕久。今夏草木長，脫身得西走。
麻鞋見天子，衣袖露兩肘。朝廷愍生還，親故傷老醜。
涕淚受拾遺，流離主恩厚。柴門雖得去，未忍即開口。
寄書問三川，不知家在否。比聞同罹禍，殺戮到鷄狗。

山中漏茅屋，誰復依戶牖。摧頽蒼松根，地冷骨未朽。
幾人全性命，盡室豈相偶。嶽峯猛虎場，鬱紹回我首。
自寄一封書，今已十月後。反畏消息來，寸心亦何有。
漢運初中興，生平老耽酒。沈思歡會處，恐作窮獨叟。

自京赴奉先縣詠懷五百字

時公妻子在奉先，按是年祿山反，書未到，公作此詩，至十一月祿山反。

杜陵有布衣，老大意轉拙。許身一何愚，竊比稷與契。
居然成濩落，白首甘契濶。蓋棺事則已，此志常覲豁。
窮年憂黎元，嘆息腸內熱。取笑同學翁，浩歌彌激烈。

非無江漢志，瀟灑送日月。生逢堯舜君，不忍便永訣。
當今廊廟具，構厦豈云缺。葵藿傾太陽，物性固莫奪。
顧惟螻蟻輩，但自求其穴。胡為慕大鯨，輒擬偃溟渤。
以茲悟生理，獨耻事干謁。兀兀遂至今，忍為塵埃沒。
終愧巢與由，未能易其節。沈飲聊自遣，放歌頗愁絕。
歲暮百草零，疾風高岡烈。天衢陰崢嶸，客子中夜發。
霜嚴衣帶斷，指直不得結。凌晨過驪山，御榻在嵒嶮。
蚩尤塞寒空，蹴踏崖谷滑。瑤池氣鬱律，羽林相摩戛。
君臣留歡娛，樂動殷膠嶠。賜浴皆長纓，與宴非短褐。
彤庭所分帛，本自寒女出。鞭撻其夫家，聚斂貢城闕。

聖人筐篚恩實欲邦國活臣如忽至理君豈棄此物
多士盈朝廷仁者宜戰慄况聞內金盤盡在衛霍室
中堂有神仙煙霧蒙玉質煖客貂鼠裘悲管逐清瑟
勸客馳蹄羹霜橙壓香橘朱門酒肉臭路有凍死骨
榮枯咫尺異惆悵難再述比轅就涇渭官渡又改轍
羣水從西下極目高崒兀疑是崆峒來恐觸天柱折
河梁幸未折枝撐聲窸窣行旅相攀援川廣不可越
老妻既異縣十口隔風雪誰能夕不顧庶往共饑渴
入門聞號咷幼子饑已卒吾寧捨一袞里巷猶嗚咽
所愧爲人父無食致天折豈知秋禾登貧窶有倉卒

生常免租稅名不隸征伐撫迹猶酸辛平人固騷屑
默思失業途因念遠戍卒憂端齊終南瀕洞不可撥

壯遊

大曆元年秋夔州作此篇叙壯年經遊之
跡按唐書公少貧不自振客遊吳越還舉
進士不中遂遊齊趙間凡八九年復歸京
師

往者十四五出遊翰墨場斯文崔魏徒以我似班揚
七齡思卽壯開口詠鳳凰九齡書大字有作成一囊
性豪業嗜酒嫉惡懷剛腸脫畧小時輩結交皆老蒼

飲酣視八極俗物都茫茫東下姑蘇臺已具浮海航
到今有遺恨不得窮扶桑王謝風流遠闔廬丘墓荒
劍池石壁反長洲芟荷香嵯峨閭門北清廟映迴塘
每趨吳太伯撫事淚浪浪枕戈憶勾踐渡浙想秦王
蒸魚聞七首除道哂要章越女天下白鑑湖五月涼
剡溪蘊秀異欲罷不能忘歸帆拂天姥中歲貢舊鄉
氣劇屈賈壘日短曹劉墻忤下考功策獨辭京尹堂
放蕩齊趙間裘馬頗清狂春歌叢臺上冬獵青丘旁
呼鷹卓櫪林逐獸雲雪岡射飛曾縱鞚引臂落鴉鷂
蘇侯據鞍喜忽如攜葛疆快意八九年西歸到咸陽

許與必詞伯賞遊實賢王曳裾置醴地奏賦入明光
天子廢食召羣公會軒裳脫身無所愛痛飲信行藏
黑貂寧免弊斑鬢兀稱觴杜曲晚耆舊四郊多白楊
坐深鄉黨敬日覺死生忙朱門任傾奪赤族迭罹殃
國馬竭粟豆官雞輸稻粱舉隅見煩費引古惜興亡
河朔風塵起岷山行幸長兩宮各警蹕萬里遙相望
崆峒殺氣黑少海旌旗黃禹功亦命子涿鹿親戎行
翠華擁吳獄螭虎噉豺狼爪牙一不中胡兵更陸梁
大軍戴草草凋瘵滿膏肓備員竊補衮憂憤心飛揚
上感九廟焚下憫萬民瘡斯時伏青蒲廷諍守御床

君辱敢愛死，赫怒幸無傷。聖哲體仁恕，寓縣復小康。
哭廟灰燼中，鼻酸朝未央。小臣議論絕，老病客殊方。
鬱鬱苦不展，羽翮困低昂。秋風動哀壑，碧蕙捐微芳。
子推避賞從，漁父濯滄浪。榮華敵勳業，歲暮有嚴霜。
吾觀鷓鴣子，才格出尋常。羣兇逆未定，側佇英俊翔。

遣懷

昔我遊宋中，惟梁孝王都。名今陳留亞，劇則貝魏俱。
邑中九萬家，高棟照通衢。舟居半天下，主客多歡娛。
白刃讐不義，黃金傾有無。殺人紅塵裏，報答在斯須。
憶與高李輩，論交入酒壚。兩公壯藻思，得我色敷腴。
氣酣登吹臺，懷古視平蕪。芒碭雲一去，鴈鶩空相呼。
先帝正好武，寰海未凋枯。猛將收西域，長戟破林胡。
百萬攻一城，獻捷不云輸。組練棄如泥，尺土負百夫。
拓境功未已，元和辭大鑪。亂離朋友盡，合沓歲月徂。
吾衰將焉託，存歿再嗚呼。蕭條益堪愧，獨在天一隅。
乘黃已去矣，凡馬徒區區。不復有顏鮑，擊舟臥荆巫。
臨餐吐更食，常恐違撫孤。

上水遣懷

大曆四年，公自岳州入潭州，故曰上水。
我衰太平時，身病戎馬後。蹭蹬多拙爲，安得不皓首。

驅馳四海內童稚日餬口但遇新少年少逢舊親友
低顏下色地故人知善誘後生血氣豪舉動見老醜
窮迫挫曩懷常如中風走一紀出西蜀于今向南斗
孤舟亂春華暮齒依蒲柳冥冥九疑葬聖者骨已朽
蹉跎陶唐人鞭撻日月久中間屈賈輩讒毀竟自取
鬱沒二悲竟蕭條猶在否齒萃清湘石逆行雜林藪
篙工密逞巧喜若醜盃酒訶謳互激遠回幹明授受
善知應觸類各藉穎脫手古來經濟才何事獨罕有
蒼蒼衆色晚熊掛玄蛇吼黃羆在樹顛正爲羣虎守
羸骸將何適履險顏益厚庶與達者論吞聲混瑕垢

舟中苦熱遣懷奉呈陽中丞通簡臺省諸公

陽中丞衡州刺史陽濟也臺省諸公謂裴
虬與李勉昔皆御史臺官

媿爲湖外客看此戎馬亂中夜混黎暍脫身亦奔竄
平生方寸心反掌帳下難嗚呼殺賢良不叱白刃散
無非丈夫特沒齒埋冰炭耻以風疾辭胡然泊湘岸
入舟雖苦熱垢膩可漑灌痛彼道邊人形骸改昏旦
中丞連帥職封內權得按身當問罪先縣實諸侯半
士卒敢輯睦啓行促精悍似聞上游兵稍逼長沙館
隣好彼克脩天機自明斷南圖卷雲水北拱載霄漢

美名光史臣長策何壯觀驅馳數公子咸願同伐叛
聲節哀有餘夫何激衰懦偏禪表三上鹵莽同一貫
始謀誰其間迴首增憤惋宗英李端公守職甚昭煥
變通迫脅地謀畫焉得美王室不肯微凶徒畧無憚
此流須卒斬神器資強幹扣寂豁煩襟皇天照嗟嘆
詠懷二首

大曆四年春公自岳州上潭州時作

人生貴是男丈夫重天機未達善一身得志行所爲
嗟余竟輾軻將老逢艱危胡雛逼神器逆節同所歸
河洛化爲血公侯草間啼西京復陷沒翠蓋蒙塵飛

萬姓悲赤子兩宮棄紫微倏忽向二紀姦雄多是非
本朝再樹立未及貞觀時日給在軍儲上官督有司
高賢迫形勢豈暇相扶持疲茶苟懷策棲屑無所施
先王實罪已愁痛正爲茲歲月不我與蹉跎病於斯
夜看豐城氣回首蛟龍池齒髮已自料意深陳苦辭

其二

邦危壞法則聖遠益愁慕飄飄桂水遊悵望蒼梧墓
潛魚不銜釣走鹿無反顧皦皦幽廣心拳拳異平素
衣食相拘閔明知限流寓風濤上春沙十里浸江樹
逆行少吉日時節空復度井竈任塵埃舟航煩數具

牽纏加老病，瑣細隘俗務。萬古一死生，胡爲足名數。
多憂汗桃源，拙計泥銅柱。未辭炎瘴毒，擺落跋涉懼。
虎狼窺中原，焉得所歷住。葛洪及許靖，避世常此路。
賢愚誠等差，自愛各馳騫。羸瘠且如何，魄奪針灸屢。
壅滯童僕慵，稽留篙師怒。終當掛帆席，天意難告訴。
南爲祝融客，勉強親杖屨。結託老人星，羅浮展衰步。

寫懷二首

大曆元年移居夔州當是二年冬作

勞生共乾坤，何處異風俗。冉冉自趨競，行行見羈束。
無貴賤不悲，無富貧亦足。萬古一骸骨，鄰家遞歌哭。

鄙夫到巫峽，三歲如轉燭。全命甘留滯，忘情任榮辱。
朝班及暮齒，日給還脫粟。編蓬石城東，采藥山北谷。
用心霜雪間，不必條蔓綠。非關故安排，曾是順幽獨。
達士如絃直，小人似鈎曲。曲直吾不知，負暄候樵牧。

其二

夜深坐南軒，明月照我膝。驚風翻河漢，梁棟已出日。
羣生各一宿，飛動自儔匹。吾亦驅其兒，營營爲私實。
天寒行旅稀，歲暮日月疾。榮名忽中人，世亂如蟣虱。
古者三皇前，滿腹志願畢。胡爲有結繩，陷此膠與漆。
禍首燧人氏，厲階董狐筆。君看燈燭張，轉使飛蛾密。

放神八極外，俛仰俱蕭瑟。終契如往還，得匪合仙術。

遣遇

大曆四年自岳之潭作

磬折辭主人，開帆駕洪濤。春水滿南園，朱崖雲日高。
舟子廢寢食，飄風爭所操。我行匪利涉，謝爾從者勞。
石間采蕨女，鬻菜輸官曹。丈夫死百役，暮返空村號。
聞見事畧同，刻剝及錐刀。貴人豈不仁，視汝如莠蒿。
索錢多門戶，喪亂紛嗷嗷。奈何黠吏徒，漁奪成逋逃。
自喜遂生理，花時貫緼袍。

解憂

大曆四年自岳之潭作

減米散同舟，路難思共濟。向來雲濤盤，衆力亦不細。
呀坑瞥眼過，飛櫓本無蒂。得失瞬息間，致遠宜恐泥。
百慮視安危，分明曩賢計。茲理庶可廣，拳拳期勿替。
屏跡

永嘉元年作

衰年甘屏跡，幽事供高臥。鳥下竹根行，龜開萍葉過。
年荒酒價乏，日併園蔬課。猶酌甘泉歌，歌長擊樽破。
逃難

五十白頭翁，南北逃世難。疎布纏枯骨，奔走苦不煖。

木言分雙
卷之二
九
三百五
已衰病方入四海一塗炭乾坤萬里內莫見容身畔
妻孥復隨我回首共悲歎故園莽丘墟鄰里各分散
歸路從此迷涕盡湘江岸

△羌村三首

羌村時公妻子所寓地

崢嶸赤雲西日脚下平地柴門鳥雀噪歸客千里至
妻孥怪我在驚定還拭淚世亂遭飄蕩生還偶然遂
隣人滿牆頭感歎亦歎欷夜闌更秉燭相對如夢寐

其二

晚歲迫偷生還家少歡趣嬌兒不離膝畏我復却去

憶昔好追涼故遶池邊樹蕭蕭北風勁撫事煎百慮
賴知禾黍收已覺糟床注如今足斟酌且用慰遲暮

其三

羣鷄正亂叫客至雞鬪爭驅雞上樹木始聞扣柴荆
父老四五人問我久遠行手中各有攜傾榼濁復清
苦辭酒味薄黍地無人耕兵革既未息兒童盡東征
請爲父老歌艱難媿深情歌罷仰天嘆四座淚縱橫

遣興

乾元元年作

昔在洛陽時朋友相追攀送客東郊道遨遊宿南山

本言分製 卷之二 十一 二百九十四
煙塵阻長河，樹羽成臯間。迴首載酒地，豈無一日還。
丈夫貴壯健，慘慄非朱顏。

遣興五首

時祿山已歿，公出爲華州司功。是詩在乾元元年秋作。

朔風飄胡鴈，慘澹帶砂礫。長林何蕭蕭，秋草萋更碧。
北里富熏天，高樓夜吹笛。焉知南隣客，九月猶絺綌。

其二

長陵銳頭兒，出獵待明發。駢弓金爪鏑，白馬蹴微雪。
未知所馳逐，但見暮光滅。歸來懸兩狼，門戶有旌節。

其三

漆以用而割，膏以明自煎。蘭摧白露下，桂折秋風前。
府中羅舊尹，沙道尚依然。赫赫蕭京兆，今爲時所憐。

其四

猛虎憑其威，往往遭急縛。雷吼徒咆哮，枝撐已在脚。
忽看皮寢處，無復睛閃爍。人有甚於斯，足以勸元惡。

其五

朝逢富家葬，前後皆輝光。共指親戚大，總麻百夫行。
送者各有死，不須羨其強。君看束縛去，亦得歸山岡。

夔府書懷四十韻

下排律附

當時之亂蓋指安史吐蕃而言

昔罷河西尉初與薊北師不才名位晚敢恨省郎遲
扈聖崆峒日端居灑灑時萍流仍汲引樗散尚恩慈
遂阻雲臺宿常懷湛露詩翠華森遠矣白首颺淒其
拙被林泉滯生逢酒賦欺文園終寂寞漢閣自磷緇
病隔君臣議慙紆德澤私揚鑣驚主辱拔劍撥年衰
社稷經綸地風雲際會期血流紛在眼涕泗亂交頤
四瀆樓船泛中原鼓角悲賊壕連白翟戰瓦落丹墀
先帝嚴靈寢宗臣切受遺恒山猶突騎遼海競張旗
田父嗟膠漆行人避蒺藜總戎存大體降將飾卑詞

楚貢何年絕堯封舊俗疑長吁翻北寇一望卷西夷
不必陪玄圃超然待具茨凶兵鑄農器講殿闢書幃
廟筭高難測天憂實在茲形容真潦倒答效莫支持
使者分王命羣公各典司恐乖均賦歛不似問瘡痍
萬里煩供給孤城最怨思綠林寧小患雲夢欲難追
卽事須嘗膽蒼生可察眉議堂猶集鳳貞觀是元龜
處處喧飛檄家家急競錐蕭車安不定蜀使下何之
釣瀨踈墳籍耕巖進奕碁地蒸餘破扇冬暖更織絺
豸遘哀登楚麟傷泣象尼衣冠迷適楚藻繪憶遊睢
賞月延秋桂傾陽逐露葵大庭終反樸京觀且僵尸

高枕虛眠晝，哀歌欲和誰。南宮載勲業，凡百慎交綏。
秋日荆南述懷三十韻

大曆三年春未移公安前作

昔承推獎分，愧匪挺生材。遲暮官臣忝，艱危衮職陪。
揚鑣隨日馭，折檻出雲臺。罪戾寬猶活，干戈塞未開。
星霜玄鳥變，身世白駒催。伏枕因超忽，扁舟任往來。
九鑽巴巽火，三誓楚祠雷。望帝傳應實，昭王問不迴。
蛟螭深作橫，豺虎亂雄猜。素業行已矣，浮名安在哉。
琴鳥曲怨憤，庭鶴舞摧頽。秋水漫湘竹，陰風過嶺梅。
苦搖求食尾，常曝報恩腮。結舌方讒柄，探腸有禍胎。

蒼茫步兵哭，展轉仲宣哀。饑藉家家米，愁徵處處盃。
休爲貧士嘆，任受衆人咍。得喪初難識，榮枯劃易該。
差池分組冕，合沓起蒿萊。不必伊周地，皆登屈宋才。
漢庭和異域，晉史圻中台。霸業尋常體，宗臣忌諱災。
羣公紛戮力，聖慮宵徘徊。數見銘鐘鼎，真宜法斗魁。
願聞鋒鏑鑄，莫使棟梁摧。磐石圭多剪，凶門轂少推。
垂旒資穆穆，祝網但恢恢。赤雀翻然至，黃龍不假媒。
賢非夢傳野，隱類鑿顏坏。自古江湖客，冥心若死灰。

遣悶

大曆三年在江陵作

地濶平沙岸，舟虛小洞房。使塵來驛道，城日避烏檣。
暑雨留蒸濕，江風借夕涼。行雲星隱見，疊浪月光芒。
螢鑿綠帷徹，蛛絲罥鬢長。哀箏猶凭几，鳴笛竟霑裳。
倚著如秦贅，過逢類楚狂。氣衝看劍匣，穎脫撫錐囊。
妖孽關東臭，兵戈隴右瘡。時清疑武畧，世亂踟文場。
餘力浮於海，端憂問彼蒼。百年從萬事，故國耿難忘。

風疾舟中伏枕書懷呈湖南親友三十六韻

大曆四年冬作時吐蕃寇靈州

軒轅休製律，虞舜罷彈琴。尚錯雄鳴管，猶傷半死心。
聖賢名古邈，羈旅病年侵。舟泊常依震，湖平早見參。

如聞馬融笛，若倚仲宣襟。故國悲寒望，羣雲慘歲陰。
水鄉霾白蜃，楓岸疊青岑。鬱鬱冬炎瘴，濛濛雨滯淫。
鼓迎方祭鬼，潭落似號禽。興盡纔無悶，愁來遽不禁。
生涯相汨沒，時物自蕭森。疑惑樽中弩，淹留冠上簪。
牽裾驚魏帝，投閣爲劉歆。狂走終奚適，微才謝所欽。
吾安藜不糝，汝貢玉爲琛。烏几重重縛，鶉衣寸寸針。
哀傷同庾信，述作異陳琳。十暑岷山葛，三霜楚戶砧。
叨陪錦帳坐，久放白頭吟。反樸時難過，忘機陸易沉。
應過數粒食，得近四知金。春草封歸恨，源花費獨尋。
轉蓬憂悄悄，行藥病泔泔。瘞天追潘岳，持危覓鄧林。

蹉跎翻學步，感激在知音。却假蘇張舌，高誇周宋鐔。
納流迷浩汗，峻址得嶽岑。城府開青旭，松筠起碧濠。
披顏爭倩倩，逸足競駸駸。朗鑒存愚直，皇天實照臨。
公孫仍恃險，侯景未生擒。書信中原濶，干戈北斗深。
畏人千里井，問俗九州箴。戰血流依舊，軍聲動至今。
葛洪尸定解，許靖力還任。家事丹砂訣，無成涕作霖。

水宿遣興奉呈羣公

大曆三年夏至江陵暫至外邑時作

魯鈍仍多病，逢迎遠復迷。耳聾須畫字，髮短不勝篋。
澤國雖勤雨，炎天竟淺泥。小江還積浪，弱纜且長堤。

歸路非關北，行舟却向西。暮年漂泊恨，今夕亂離啼。
童稚頻書札，盤食詎糝藜。我行何到此，物理直難齊。
高枕飜星月，嚴城疊鼓鞞。風號聞虎豹，水宿伴鳧鷖。
異縣驚虛往，同人惜解携。蹉跎常泛鷁，展轉屢聞鷄。
嶷嶷瑚璉器，陰陰桃李蹊。餘波期救涸，費日苦輕齋。
杖策門闌邃，肩輿羽翮低。自傷甘賤役，誰愍強幽棲。
巨海能無釣，浮雲亦有梯。勳庸思樹立，語默可端倪。
贈粟困應指，登橋柱必題。丹心老未折，時訪武陵溪。

七言古

述懷類

釋悶

四海十年不解兵，犬戎也復臨咸京。失道非關出襄野，揚鞭忽是過胡城。豺狼塞路人斷絕，烽火照夜屍縱橫。天子亦應厭奔走，羣公固合思昇平。但恐誅求不改轍，聞道嬖孽能全生。江邊老翁錯料事，眼暗不見風塵清。

醉爲馬墜諸公攜酒相看

大曆二年夔州時作

甫也諸侯老賓客，罷酒酣歌拓金戟。騎馬忽憶少年時，散蹄迸落瞿塘石。白帝城門水雲外，低身直下八

千尺。粉堞電轉紫遊韁，東得平岡出天壁。江村野堂爭入眼，垂鞭鞞鞚凌紫陌。向來皓首驚萬人，自倚紅顏能騎射。安知決臆追風足，朱汗驂驪猶噴玉。不虞一蹶終損傷，人生快意多所辱。職當憂戚伏衾枕，况乃遲暮加煩促。朋知來問腆我顏，杖藜強起依僮僕。語盡還成開口笑，提攜別掃清溪曲。酒肉如山又一時，初筵哀絲動豪竹。共指西日不相貸，喧呼且覆杯中渌。何必走馬來爲問，君不見稽康養生被殺戮。

五言古

懷古類

述古三首

代宗卽位公在梓州寶應元年作

赤驥頓長纓非無萬里姿悲鳴淚至地爲問馭者誰
鳳凰從天來何意復高飛竹花不結實念子忍朝饑
古時君臣合可以物理推賢人識定分進退固其宜

其二

市人日中集於利競錐刀置膏烈火上哀哀自煎熬
農人望歲稔相率除蓬蒿所務穀爲本邪羸無乃勞
舜舉十六相身尊道何高秦時任商鞅法令如牛毛

其三

漢光得天下祚永固有開豈惟高祖聖功自蕭曹來
經綸中興業何代無長才吾慕寇鄧勲濟時信良哉
耿賈亦宗臣羽翼共徘徊休運終四百圖畫在雲臺

遣興五首

乾元二年在秦州作

蟄龍三冬臥老鶴萬里心昔時賢俊人未遇猶視今
稽康不得死孔明有知音又如壠底松用舍在所尋
大哉霜雪榦歲久爲枯林

其二

昔者龐德公未嘗入州府襄陽耆舊間處士節獨苦

豈無濟時策終竟畏羅罟林茂鳥有歸水深魚知聚
舉家隱鹿門劉表焉得取

其三

陶潛避俗翁未必能達道觀其著書集頗亦恨枯稿
達生豈是足默識蓋不早有子賢與愚何其掛懷抱

其四

賀公雅吳語在位常清狂上疏乞骸骨黃冠歸故鄉
爽氣不可致斯人今則亡山陰一茅宇江海日淒涼

其五

吾憐孟浩然短褐卽長夜賦詩何必多往往凌鮑謝

清江空舊魚春雨餘甘蔗每望東南雲令人幾悲吒

冬到金華山觀因得故拾遺陳公學堂遺迹

按本傳陳子昂字伯玉梓州射洪縣人少

讀書於金華山尤善屬文唐興文章承徐

庾之後子昂始變爲雅正有感遇詩二十

八章王適見之曰是必爲海內文宗初舉

進士武后時始擢麟臺正字遷左拾遺解

官歸縣令段簡貪暴聞其富欲害之捕送

獄中憂憤而卒大曆中東川節度使李叔

明爲立旌德碑於梓州而學堂至今猶存

涪右衆山內金華紫崔嵬上有蔚藍天垂光抱瓊臺
繫舟棲絕壁杖策窮縈迴四顧俯層巔淡然川谷開
雪嶺日色死霜鴻有餘哀焚香玉女跪霧裏仙人來
陳公讀書堂石柱仄青苔悲風爲我起激冽傷雄材
陳拾遺故宅

故宅與書堂不相遠

拾遺平昔居大屋尚脩椽悠揚荒山日慘淡故園煙
位下曷足傷所貴者聖賢有才繼騷雅哲匠不比肩
公生揚馬後名與日月懸同遊英俊人多秉輔佐權
彥昭超玉價郭振起通泉到今素壁滑灑翰銀鈎連

盛事會一時此堂豈千年終古立忠義感遇有遺編

過郭代公故宅

郭震字元振魏州貴鄉人以字顯舉進士
授通泉尉任俠使氣撥去小節嘗盜鑄及
掠賣部中人口以餉遺賓客百姓厭苦武
后召欲詰問旣與語奇之索其文章上寶
劍篇后覽嘉嘆遂得擢用景雲二年進同
中書門下三品玄宗誅太平公主睿宗御
承天門諸宰相走伏外省獨元振總兵扈
從事定宿中書省一十四日以功封代國

公代公故宅是作尉通泉所居者

豪雋初未遇其意或脫畧代公通泉尉放意何自若
及夫登袞冕直氣森噴薄磊落見異人豈伊常情度
定策神龍後宮中翕清廓俄頃辨尊親指揮存顧託
羣公見慙色王室無削弱迥出名臣上丹青照臺閣
我行得遺跡池館皆疏鑿壯公臨事斷顧步滄橫落
高詠寶劍篇神交付冥漠

七言古

懷古類

憶昔二首

代宗廣德二年吐蕃陷京師代宗幸陝公
賦此詩

憶昔先皇巡朔方千騎萬乘入咸陽陰山驕子汗血
馬長驅東胡胡走藏鄴城反覆不足怪關中小兒壞
紀綱張后不樂上爲忙至今今上猶撥亂勞心焦思
補四方我昔近侍叨奉引出兵整肅不可當爲留猛
士守未央致使岐雍防西羗犬戎直來坐御床百官
跣足隨天王願見北地傅介子老儒不用尚書郎
憶昔開元全盛日小邑猶藏萬家室稻米流脂粟米
白公私倉廩俱豐實九州道路無豺虎遠行不勞吉

日出齊紈魯縞車班班男耕女桑不相失宮中聖人
奏雲門天下朋友皆膠漆百餘年間未災變叔孫禮
樂蕭何律豈聞一絹直萬錢有田種穀今流血洛陽
宮殿燒焚盡宗廟新除狐兔穴傷心不忍問耆舊復
恐初從亂離說小臣魯鈍無所能朝廷記識蒙祿秩
周宣中興望我皇灑血江漢長衰疾

五言古

時事類

新安吏

公自註收京後作雖收兩京賊猶充斥王

深父云時郭子儀等九節度之師圍安慶
緒於鄴師潰於城下諸節度各還本鎮子
儀保河陽詔留守東都從新安吏以下至
無家別蓋紀當時鄴師之敗於是朝廷調
諸郡兵益急次丁盡行秦之謫戍無以加
此

客行新安道喧呼聞點兵借問新安吏縣小更無丁
府帖昨夜下次選中男行中男絕短小何以守王城
肥男有母送瘦男獨伶俜白水暮東流青山猶哭聲
莫自使眼枯收汝淚縱橫眼枯却見骨天地終無情

我軍收相州，日夕望其平。豈意賊難料，歸軍星散營。
就糧近故壘，練卒依舊京。掘壕不到水，牧馬役亦輕。
况乃王師順，撫養甚分明。送行勿泣血，僕射如父兄。

潼關吏

安祿山反，詔哥舒翰守潼關。翰失守爲賊所敗，後又收復長安，脩築阨險。是詩當是公歸京師時作。

士卒何草草，築城潼關道。大城鐵不如，小城萬丈餘。
借問潼關吏，脩關還備胡。要我下馬行，爲我指山隅。
連雲列戰格，飛鳥不能踰。胡來但自守，豈復憂西都。

丈人視要處，窄狹容單車。艱難奮長戟，千古用一夫。
哀哉桃林戰，百萬化爲魚。請囑防關將，慎勿學哥舒。

石壕吏

石壕地名，東嶠至西嶠，相去三十五里，路極險絕，西嶠卽石壕也。

暮投石壕村，有吏夜捉人。老翁踰牆走，老婦出門看。
吏呼一何怒，婦啼一何苦。聽婦前致詞，三男鄴城戍。
一男附書至，二男新戰死。存者且偷生，死者長已矣。
室中更無人所有，乳下孫孫有母未去。出入無完裙，
老嫗力雖衰，請從吏夜歸。急應河陽役，猶得備晨炊。

夜久語聲絕如聞泣幽咽天明登前途獨與老翁別
垂老別

乾元三年安慶緒爲史思明所殺於是思
明自河南分爲四道會於汴梁東京與鄭
滑等州相繼陷沒而防守愈急此詩當是
其年冬晚作也

四郊未寧靜垂老不得安子孫陣亡盡焉用身獨完
投杖出門去同行爲辛酸幸有牙齒存所悲骨髓乾
男兒旣介冑長揖別上官老妻臥路啼歲暮衣裳單
孰知是死別且復傷其寒此去必不歸還聞勸加餐

土門壁甚堅杏園度亦難勢異鄴城下縱死時猶寬
人生有離合豈擇衰盛端憶昔少壯日遲迴竟長歎
萬國盡征戍烽火被岡巒積屍草木腥流血川原丹
何鄉爲樂土安敢尚盤桓棄絕蓬室居塌然摧肺肝
無家別

寂寞天寶後園廬但蒿藜我里百餘家世亂各東西
存者無消息死者爲塵泥賤子因陣敗歸來尋舊蹊
久行見空巷日瘦氣慘悽但對狐與狸豎毛怒我啼
四鄰何所有一二老寡妻宿鳥戀本枝安辭且窮棲
方春獨荷鋤日暮還灌畦縣吏知我至召令習鼓鞞

雖從本州役內顧無所攜近行止一身遠去終轉迷
家鄉既蕩盡遠近理亦齊永痛長病母五年委溝谿
生我不得力終身兩酸嘶人生無家別何以爲蒸黎

留花門

按志陝西甘州有花門山堡東北千里至
回紇衙帳是時廣平王爲元帥以朔方吐
蕃回紇諸兵討賊大捷之至德二年葉護
請留諸兵于沙范以平餘孽遂爲中國他
日之患花門蓋指回紇而言

北門天驕子飽肉氣勇決高秋馬肥健挾矢射漢月

自古以爲患詩人厭薄代脩德使其來羈縻固不絕
胡爲傾國至出入暗金闕中原有驅除隱忍用此物
公主歌黃鵠君王指白日連雲屯左輔百里見積雪
長戟鳥休飛哀笳曉幽咽田家最恐懼麥倒桑枝折
沙苑臨清渭泉香草豐潔渡河不用船千騎常撒烈
胡塵踰太行雜種抵京室花門既須留原野轉簫瑟

塞蘆子

蘆子關名築關所以備吐蕃

五城何迢迢迢迢隔河水邊兵盡東征城內空荆杞
思明割懷衛秀巖西未已廻畧大荒來嶠圍蓋虛爾

延州秦北戶關防猶可倚焉得一萬人疾驅塞蘆子
岐有薛大夫旁制山賊起近聞昆戎徒爲退三百里
蘆關扼兩寇深意實在此誰能叫帝闡胡行速如鬼

往在

此詩蓋述當時之事大曆元年作

往在西京時胡來滿彤宮中宵焚九廟雲漢爲之紅
解瓦飛十里總帷紛層空疚心惜木主一一灰悲風
合昏非鐵騎清旭散錦幪賊臣表逆節相賀以成功
是時妃嬪戮連爲糞土叢當宁陷玉座白間剝盡蟲
不知二聖處私泣百歲翁車駕旣云還楹桷歛穹崇

故老復涕泗祠官樹椅桐宏壯不如初已見帝力雄
前春禮郊廟祀事親聖躬微軀忝近臣景從陪羣公
登堦捧玉冊我冕聆金鐘侍祠愿先露掖垣邇濯龍
天子惟孝孫五雲起九重鏡奩換粉黛翠羽猶葱朧
前者厭羯胡後來遭犬戎俎豆腐羶肉呆恩行角弓
安得自西極申命空山東盡驅詣闕下士庶塞關中
主將曉逆順元元歸始終一朝自罪已萬里車書通
鋒鏑供鋤犁征伐聽所從冗官各復業土著還力農
君臣節儉足朝野懽呼同中興似國初繼體如太宗
端拱納諫諍和風日冲融赤墀櫻桃枝隱映銀絲籠

于春薦陵寢永永垂無窮
京都不再火涇渭開愁容
歸號故松栢老去若飄蓬

客從

此詩當是大曆四年作

客從南溟來遺我泉客珠
珠中有隱字欲辨不成書
緘之篋笥久以俟公家須
開視化為血哀令徵歛無

白馬

此潭州詩崔瓘為衛玠所殺事在大曆三年

白馬東北來空鞍雙貫箭
可憐馬上郎意氣今誰見

近時王將戮中夜商於戰
喪亂死多門嗚呼涕如霰

喜聞官軍已臨賊境二十韻

下排律附

按史至德二年九月丁亥以廣平王俶為元帥司空郭子儀副之將朔方等軍及回紇西域之眾發鳳翔壬寅至長安城西陳于香積寺之北澧水之東與賊戰斬首六萬賊大奔潰癸卯大軍入京師甲辰捷書至鳳翔

胡虜潛京縣官軍擁賊壕
鼎魚猶假息穴蟻欲何逃
帳殿羅玄冕轅門照白袍
秦山當警蹕漢苑入旌旄

路失羊腸險，雲橫雉尾高。五原空壁壘，八水散風濤。
今日看天意，遊魂貸爾曹。乞降那更得，尚詐莫徒勞。
元帥歸龍種，司空握豹韜。前軍蘇武節，左將呂虔刀。
兵氣回飛鳥，威聲沒巨鼇。戈鋌開雪色，弓矢向秋毫。
天步艱方盡，時和運更遭。誰云遺毒螫，已是沃腥臊。
睿想丹墀近，神行羽衛牢。花門騰絕漠，拓羯渡臨洮。
此輩感恩至，羸俘何足操。鋒先衣染血，騎突劍吹毛。
喜覺都城動，悲因子女號。家家賣釵釧，只待獻香醪。

柳司馬至

大曆二年吐蕃入寇，兩京戒嚴，公因司馬

相會故作是詩

有使歸三峽，相過問兩京。函關猶出將，渭水更屯兵。
設備邯鄲道，和親邏些城。幽燕唯鳥去，商洛少人行。
衰謝身何補，蕭條病轉嬰。霜天到宮闕，戀主寸心明。

七言古

時事類

悲陳陶

天寶十五年十月辛丑，房瑄與安祿山戰于陳陶，斜敗。績癸卯，瑄又以南軍戰，復敗。績，陳陶在今陝西咸陽縣斜者山澤之名。

孟冬十郡良家子血作陳陶澤中水野曠天清無戰
聲四萬義軍同日死羣胡歸來血洗箭仍唱胡歌飲
都市都人回面向北啼日夜更望官軍至

悲青坂

爾雅坡者曰坂唐紀所謂癸卯又以南軍
戰敗績南軍將陳希文

我軍青坂在東門天寒飲馬太白窟黃頭奚兒日向
西數騎彎弓敢馳突山雪河水野蕭颺青是烽煙白
人骨焉得附書與我軍忍待明年莫倉卒

洗兵馬

公自註收京後作

中興諸將收山東捷書夜報清晝同河廣傳聞一蒂
過胡兒命在破竹中祇殘鄴城不日得獨任朔方無
限功京師皆騎汗血馬回紇餒肉蒲萄宮已喜皇威
清海岱常思仙仗過崆峒三年笛裏關山月萬國兵
前草木風成王功大心轉小郭相謀深古來少司徒
清鑒懸明鏡尚書氣與秋天杳二三豪俊爲時出整
頓乾坤濟時了東走無復憶鱸魚南飛覺有安巢鳥
青春復隨冠冕入紫禁正耐煙花繞鶴駕通宵鳳輦
備雞鳴問寢龍樓曉攀龍附鳳勢莫當天下盡化爲

侯王汝等豈知蒙帝力時來不得誇身強關中既畱
 蕭丞相幕下復用張子房張公一生江海客身長九
 尺鬚眉蒼微起適遇風雲會扶顛始知籌策良青袍
 白馬更何有後漢今周喜再昌寸地尺天皆入貢奇
 祥異瑞爭來送不知何國致白環復道諸山得銀甕
 隱士休歌紫芝曲詞人解撰河清頌田家望望惜雨
 乾布穀處處崔春種淇上健兒歸莫懶城南思婦愁
 多夢安得壯士挽天河淨洗甲兵長不用

青絲

僕固懷恩鐵力部人從郭子儀討賊累立

大功進封大寧郡王廣德二年謀反誘吐
 蕃兵二十萬入寇代宗親率神策軍討平
 之懷恩病死於靈武其子瑒亦為部下所
 殺此詩當是二年作

青絲白馬誰家子麤豪且逐風塵起不聞漢王放妃
 嬪近靜潼關掃蜂蟻殿前兵馬破汝時十月即為虜
 粉期未如向縛歸金闕萬一皇恩下玉墀

近聞

近聞太戎遠遁逃牧馬不敢侵臨洮渭水逶迤白日
 靜隴山蕭瑟秋雲高崆峒五原亦無事北庭數有關

水言分數 卷之二 三
中使似聞贊普更求親舅甥和好應難棄

漁陽

按史是年十月吐蕃寇奉天京師戒嚴以
雍王适為關內兵馬元帥郭子儀副之大
敗史朝義漁陽指雍王所統兵也

漁陽突騎猶精銳赫赫雍王都節制猛將飄然恐後
時本朝不入非高計祿山北築雄武城舊防敗走歸
其營繫書請問燕耆舊今日何須十萬兵

自平

自平宮中呂太一收珠南海千餘日近供生犀翡翠

稀復恐征戍干戈密蠻溪豪族小動擬世封刺史非
時朝蓬萊殿裏諸王將才如伏波不得驕

五言古

邊塞類

前出塞九首

乾元二年公至秦州思天寶間而作戍交
河以備回紇入寇

戚戚去故里悠悠赴交河公家有程期亡命嬰禍羅
君已富土境開邊一何多棄絕父母恩吞聲行負戈

其二

王云字從軍情
世是忠義
然有勳于古紀唱也
不但人所不能及也
杜之所不為有

出門日已遠。不受徒旅欺。骨肉恩豈斷。男兒死無時。走馬脫轡頭。手中挑青絲。捷下萬仞岡。俯身試舉旗。

其三

磨刀鳴咽水。水赤刃傷手。欲輕腸斷聲。心緒亂已久。丈夫誓許國。憤惋復何有。功名圖麒麟。戰骨當速朽。

其四

送徒既有長。遠戍亦有身。生死向前去。不勞吏怒嗔。路逢相識人。附書與六親。哀哉兩決絕。不復同苦辛。

其五

迢迢萬餘里。領我赴三軍。軍中異苦樂。主將寧盡聞。

隔河見胡騎。倏忽數百羣。我始為奴僕。幾時樹功勳。

其六

挽弓當挽強。用箭當用長。射人先射馬。擒賊先擒王。殺人亦有限。列國自有疆。苟能制侵凌。豈在多殺傷。

其七

驅馬天雨雪。軍行入高山。逕危抱寒石。指落層冰間。已去漢月遠。何時築城還。浮雲暮南征。可望不可攀。

其八

單于寇我壘。百里風塵昏。雄劍四五動。彼軍為我奔。虜其名王歸。繫頸授轅門。潛身備行列。一勝何足論。

劉云此詩自負經
滿若軍中苦
此人

字子安人
名品
激若石同

廷評好甚然而不

其九

從軍十年餘。能無分寸功。衆人貴。苟得欲語羞。雷同中原有鬪爭。况在狄與戎。丈夫四方志。安可辭固窮。

後出塞五首

天寶十四載三月安祿山及契丹戰于漢水敗之故有後出塞五首而出兵起漁陽

也同是乾元二年作

男兒生世間。及壯當封侯。戰伐有功業。焉能守舊丘。召募赴薊門。軍動不可留。千金買馬鞍。百金裝刀頭。閭里送我行。親戚擁道周。斑白居上列。酒酣進庶羞。

少年別有贈含笑者吳鉤

其二

朝進東門營。暮上河陽橋。落日照大旗。馬鳴風蕭蕭。平沙列萬幕。部伍各見招。中天懸明月。令嚴夜寂寥。悲笳數聲動。壯士慘不驕。借問大將誰。恐是霍嫖姚。

其三

古人重守邊。今人重高勳。豈知英雄主。出師亘長雲。六合已一家。四夷且孤軍。遂使貔虎士。奮身勇所聞。拔劍擊大荒。日收胡馬羣。誓開玄冥北。持以奉吾君。

其四

獻凱日繼踵。兩蕃靜無虞。漁陽豪俠地。擊鼓吹笙箏。
雲帆轉遼海。粳稻來東吳。越羅與楚練。照耀輿臺軀。
主將位益崇。氣驕凌上都。邊人不敢議。議者死通衢。

其五

我本良家子。出師亦多門。將驕益愁思。身貴不足論。
躍馬二十年。恐辜明主恩。坐見幽州騎。長驅河洛昏。
中夜間道歸故里。但空村惡名幸脫免。窮老無兒孫。

遣興三首

乾元二年公在秦州作

下馬古戰場。四顧但茫然。風悲浮雲去。黃葉墜我前。

朽骨穴螻蟻。又為蔓草纏。故老行歎息。令人尚開邊。
漢虜互勝負。封疆不常全。安得廉頗將。三軍同晏眠。

其二

高秋登塞山。南望馬邑州。降虜東擊胡。壯健盡不留。
穹廬莽牢落。上有行雲愁。老弱哭道路。願聞甲兵休。
鄴中事反覆。死人積如丘。諸將已茅土。載驅誰與謀。

其三

豐年孰云遲。甘澤不在早。耕田秋雨足。禾黍已映道。
春苗九月交。顏色同日老。勸汝衡門士。勿悲尚枯槁。
時來展材力。先後無醜好。但訝鹿皮翁。忘機對芳草。

通字在

將帥類

寄贈王十將軍承俊

大曆元年春作

將軍膽氣雄，臂懸兩角弓。纏結青驄馬，出入錦城中。時危未受鉞，勢屈難爲功。賓客滿堂上，何人高義同。

投贈哥舒開府二十韻

排律附

哥舒姓翰名，其先蓋突厥。施酋長哥舒部，之裔天寶六載明。皇召見於華清宮，命攻石堡城。十一載加開府儀，同三司。十四載翰凡三入朝，翰待諸將少恩，衆以不能死

節於安祿山而反事之故，輕其爲人。

今代麒麟閣，何人第一功。君王自神武，駕馭必英雄。開府當朝傑，論兵邁古風。先鋒百勝在，畧地兩隅空。青海無傳箭，天山早掛弓。廉頗仍走敵，魏絳已和戎。每惜河皇棄，新兼節制通。智謀垂睿想，出入冠諸公。日月低秦樹，乾坤遶漢宮。胡人愁逐北，宛馬又從東。受命邊沙遠，歸來御席同。軒墀曾寵鶴，畋獵舊非熊。茅土加名數，山河誓始終。策行遺戰代，契合動照融。勲業青冥上，交親氣槩中。未爲珠履客，已見白頭翁。壯節初題柱，生涯獨轉蓬。幾年春草歇，今日暮途窮。

軍事留孫楚行間識呂蒙防身一長創將欲倚崆峒

七言古

將帥類

久雨期王將軍不至

公於永泰間在成都欲至夔州期將軍王承俊不至賦此

天雨蕭蕭滯茅屋空山無以慰幽獨銳頭將軍來何遲令我心中苦不足數看黃霧亂玄雲時聽嚴風折喬木泉源泠泠雜猿狖泥潭漠漠饑鴻鵠歲暮窮陰耿未已人生會向難再得意爾腰下鐵絲箭射殺林

中雪色鹿前者坐皮因問毛知子歷險人馬勞異獸如飛星宿落應弦不礙蒼山高安得突騎只豆千萃然眉骨皆爾曹走平亂世相催促一豁明王正鬱陶憶昔范增碎玉斗未使吳兵著白袍昏昏閭闔閉氛稜十月荆南雷怒號

五言古

軍旅類

揚旗

代宗大曆三年夏六月成都尹鄭公置酒公堂觀騎士試新旗幟前年吐蕃之難時

公在嚴武幕府

江雨颯長夏，府中有餘清。我公會賓客，肅肅有異聲。
 初筵閱軍裝，羅列照廣庭。庭空六馬入，駮駮揚旗旌。
 迴迴偃飛蓋，熠熠迸流星。來纏風颺急，去擘山嶽傾。
 材歸俯身盡，妙取畧地平。虹蜺就掌握，舒卷隨人輕。
 三州陷犬戎，但見西嶺青。公來練猛士，欲奪天邊城。
 此堂不易升，庸蜀日已寧。吾徒且加餐，休適蠻與荆。

宮殿類

玉華宮

玉華宮在坊州宜君縣之鳳凰谷，正殿覆

瓦餘皆葺茅，當時以為清涼勝於九成宮。

此詩乃公趨鄜州路紀所經見，兼述抵家

情況。

溪回松風長，蒼鼠竄古瓦。不知何王殿，遺構絕壁下。
 陰房鬼火青，壞道哀湍瀉。萬籟真笙竽，秋色正瀟灑。
 美人為黃土，况乃粉黛假。當時侍金輿，故物獨石馬。
 憂來藉草坐，浩歌淚盈把。冉冉征途間，誰是長年者。

九成宮

九成宮在今鳳翔府麟遊縣西五里，本隋
 仁壽宮，唐貞觀間太宗脩之以避暑，因山

有九重故更名九成宮

蒼山入百里崖斷如杵臼曾宮憑風迥岌業土囊口
立神扶棟樑鑿翠開戶牖其陽產靈芝其陰宿牛斗
紛披長松倒揭巖怪石走哀猿啼一聲客淚迸林藪
荒哉隋家帝製此今頽朽向使國不亡焉爲巨唐有
雖無新增脩尚置官居守巡非瑤水遠跡是雕墻後
我來屬時危仰望嗟嘆久天王守太白駐馬更回首

陵寢類

題衡山縣文宣王廟新學堂呈陸宰

大曆五年至衡山而作

旄頭彗紫微無復俎豆事金甲相排蕩青衿一憔悴
嗚呼已十年儒冠弊於地征夫不遑息學者淪素志
我行洞庭野歛得文翁肆侏侏胄子行若舞風雩至
周室宜中興孔門未應棄是以資雅木渙然立新意
衡山雖小邑首唱恢大義因見縣尹心根源舊宮闕
講堂非曩構大屋加塗墍下可容百人墻隅亦深邃
何必三千徒始壓戎馬氣林木在庭戶密榦疊蒼翠
有井朱夏時轆轤凍堦祀耳聞讀書聲殺伐災髣髴
故園延歸望衰年減愁思南紀收波瀾西河共風味
采詩倦跋涉載筆尚可記高歌激宇宙凡百慎失墜

橋陵詩三十韻因呈縣內諸官

下排律附

開元三年六月睿宗崩十月葬橋陵

先帝昔晏駕茲山朝百靈崇岡擁象設沃野開天庭
卽事壯重險論功超五丁坡陁因厚地却畧羅峻屏
雲闕虛冉冉風松肅泠泠石門霜露白玉殿莓苔青
宮女曉知曙祠官朝見星空梁簇畫戟陰井敲銅瓶
中使日夜繼惟王心不寧豈徒卹備享尚謂求無形
孝理敦國政神疑推道經瑞芝產廟柱好鳥鳴巖扃
高嶽前律宰洪河左滢淡金城蓄峻趾沙苑交迴汀
永與輿區固川原紛眇冥居然赤縣立臺榭爭岩崇

官屬果稱是聲華真可聽王劉美竹潤裴李春蘭馨
鄭氏才振古啖侯筆不停遺辭必中律利物常發硯
綺繡相展轉琳瑯愈青熒側聞魯恭化秉德崔瑗銘
太史候鳧影王喬隨鶴翎朝儀限霄漢客思廻林坰
輻軻辭下杜飄颻凌濁涇諸生舊袒褐旅泛一浮萍
荒歲兒女瘦暮途涕泗零主人念老馬解寺客秋螢
流寓理豈愜窮愁醉未醒何當擺俗累浩蕩乘滄溟

行次昭陵

昭陵唐太宗陵在陝西醴泉縣九嶷山天
寶五載詔天下通一藝者詣京師公自東

都應詔故道經昭陵而作

舊俗疲庸主羣雄問獨夫
識歸龍鳳質威定虎狼都
天屬尊堯典神功協禹謨
風雲隨絕足日月繼高衢
文物多師古朝廷半老儒
直詞寧戮辱賢路不崎嶇
往者災猶降蒼生喘未蘇
指揮安率土盪滌撫洪鑪
壯士悲陵邑幽人拜鼎湖
玉衣晨自舉鐵馬汗常趨
松栢瞻虛殿塵沙立暝途
寂寥開國日流恨滿山隅

重經昭陵

前經昭陵詩是天寶五載作此詩當是九載歸長安重經陵下作

草昧英雄起謳歌曆數歸
風塵三尺劍社稷一戎衣
翼亮貞文德不承戢武威
聖圖天廣大宗祀日光輝
陵寢盤空曲熊羆守翠微
再窺松栢路還見五雲飛
冬日洛城北謁玄元皇帝廟

玄元皇帝李老君也天寶元年陳王府叅軍田周秀上言玄元皇帝降于丹鳳門之通衢告錫靈符在尹喜之故宅上遣使就畱谷故關尹宅發得之乃置玄元廟于大寧坊是秋改爲太上玄元皇帝宮二年追尊大聖祖玄元皇帝仍詔天下建紫極宮

此詩天寶八載公自長安復遊東都作

配極玄都闕憑高紫籙長守祧嚴具禮掌節鎮非常
碧瓦初寒外金莖一氣旁山河扶繡戶日月近雕梁
仙李盤根大猗蘭奕葉光世家遺舊史道德付今王
畫手看前輩吳生遠擅場森羅移地軸妙絕動宮墻
五聖連龍袞千官列鴈行冕旒俱秀發旌旆盡飛揚
翠栢深留景紅梨迥得霜風箏吹玉柱露井凍銀床
身退卑周室經傳拱漢皇谷神如不死養拙更何鄉

謁先王廟

先王廟有二其一在成都其一在夔州此

則在夔之廟

慘澹風雲際乘時各有人力侔分社稷志屈偃經綸
復漢留長策中原仗老臣雜耕心未已歐血事酸辛
霸氣西南歇雄圖曆數屯錦江元過楚劍閣復通秦
舊俗存祠廟空山泣鬼神虛簷交鳥道枯木半龍鱗
竹送清溪月苔移玉座春閭閻兒女換歌舞歲時新
絕域歸舟遠荒城繫馬頻如何對搖落况乃久風塵
孰與關張並功臨耿鄧親應天才不小得士契無隣
遲暮堪幃幄飄零且釣緡向來憂國淚寂寞洒衣巾

諸葛廟

廟在夔州府治八陣臺下與先王廟相近
 父遊巴子國屢入武侯祠竹日斜虛寢溪風蒲薄帷
 君臣當共濟賢聖亦同時翊戴歸先王并吞更出師
 蟲蛇穿畫壁巫覡綴蛛絲歛憶吟梁父躬耕起未遲
 五言古

居室類

寄題江外草堂

公從入蜀卜居成都浣花溪成都亂遂走
 梓州懷思草堂寄題
 我生性放誕雅欲逃自然嗜酒愛風竹卜居此林泉

遭亂到蜀江臥病遣所便誅茅初一畝廣地方連延
 經營上元始斷手實應年敢謀土木麗自覺向勢堅
 亭臺隨高下敞豁當清川雖有會心侶數能同釣船
 干戈未偃息安得酣歌眠蛟龍無定窟黃鵠摩蒼天
 古來賢達士寧受外物牽顧惟魯鈍姿豈識悔吝先
 偶攜老妻去慘澹凌風煙事迹無固必幽貞愧雙全
 尚念四小松蔓草易拘纏霜骨不甚長永為隣里憐

草堂

草堂在成都浣花溪上

昔我去草堂蠻夷塞成都今我歸草堂成都適無虞

請陳初亂時反覆乃須臾大將赴朝廷羣小起異圖
中宵斬白馬盟軟氣已麤西取邛南兵北斷劍閣隅
布衣數十人亦擁專城居其勢不兩大始聞蕃漢殊
西卒却倒戈賊臣互相誅焉知肘腋禍自及梟獍徒
義士皆痛憤紀綱亂相踰一國實三公萬人欲爲魚
唱和作威福孰肯辨無辜眼前列杻械背後吹笙竽
談笑行殺戮濺血滿長衢到今用鉞地風雨聞號呼
鬼妾與鬼馬色悲克爾娛國家法令在此又足驚吁
賤子且奔走三年望東吳弧矢暗江海難爲遊五湖
不忍竟舍此復來薙榛蕪入門四松在步履萬竹踈

舊犬喜我歸低徊入衣裾隣里喜我歸沽酒攜胡蘆
大官喜我來遣使問所須城郭喜我來賓客隘村墟
天下尚未寧健兒勝腐儒飄飄風塵際何地置老夫
於時見疣贅骨髓幸未枯飲啄愧殘生食薇不敢餘

水檻

水檻草堂前近水之檻廣德二年自梓閬
歸成都作

蒼江多風颭雲雨晝夜飛茅軒駕巨浪焉得不低垂
遊子久在外門戶無人持高岸尚爲谷何傷浮柱欹
扶顛有勸誠恐貽識者嗤旣殊大厦傾可以一木支

臨川視萬里何必欄檻爲人生感故物慷慨有餘悲
破船

廣德二年公再歸草堂其船在外三年故
破

平生江海心宿昔具扁舟豈惟清溪上日傍柴門遊
蒼惶避亂兵緬懷邈舊丘鄰人亦已非野竹獨脩脩
船舷不重扣埋沒已經秋仰看西飛翼下愧東逝流
故者或可掘新者亦易求所悲數奔竄白屋難久留

營屋

上元元年公治草堂時已植此竹出外三
年仍歸草堂復營前屋賦此

我有陰江竹能令朱夏寒陰通積水內高入浮雲端
甚疑鬼物憑不顧翦伐殘東偏若面勢戶牖可永安
愛惜已六載茲晨去千竿蕭蕭見白日洶洶開奔湍
度堂匪華麗養拙異考槃草茅雖薙葺衰病方少寬
沈然順所適此足代加餐寂無斤斧饗庶遂憇息懽
柴門

大曆元年夏末公求居灤西時作

泛舟登灤西迴首望兩崖東城乾旱天其氣如焚柴
長影沒窈窕餘光散餘鈇大江蟠嵌根歸海成一家

下衝割坤軸，竦壁攢鎮鉞。蕭瑟灑秋色，氣昏霾日車。
峽門自此始，最窄容浮查。禹功翊造化，疏鑿就欹斜。
巴渠決太古，衆水爲長虵。風煙渺吳蜀，舟楫通鹽麻。
我今遠遊子，飄轉混泥沙。萬物附本性，約身不願奢。
茅棟蓋一床，清池有餘花。濁醪與脫粟，在眼無咨嗟。
山荒人民少，地僻日夕佳。貧病固其常，富貴任生涯。
老於干戈際，宅幸蓬華遮。石亂上雲氣，杉清延日華。
賞妍又分外，理愜夫何誇。足了垂白年，敢居高士差。
書此豁平昔，迴首猶暮霞。

客居

公在雲安欲遷夔州時作

客居所居堂，前江後山根。下塹萬尋岸，蒼濤鬱飛翻。
葱青衆木稍，邪豎雜石痕。子規晝夜啼，壯士斂精魂。
峽開四千里，水合數百源。人虎相半居，相傷終兩存。
蜀麻久不來，吳鹽擁荆門。西南失大將，商旅自星奔。
今又降元戎，已聞動行軒。舟子候利涉，亦憑節制尊。
我在路中央，生理不得論。臥愁病脚廢，徐步視小園。
短畦帶碧草，悵望思王孫。鳳隨其皇去，籬雀暮喧繁。
覽物想故國，十年別鄉村。日暮歸幾翼，北林空自昏。
安得覆八溟，爲君洗乾坤。稷契易爲力，犬戎何足吞。

儒生老無成，臣子憂四藩。篋中有舊筆，情至時復援。

客堂

大曆元年春公在雲安作

憶昨離少城，而今異楚蜀。捨舟復深山，宵窅一林麓。
栖泊雲安縣，消中內相毒。舊疾其戴來，衰年得無足。
死爲殊方鬼，頭白免短促。老馬終望雲，南鴈意在北。
別家長兒女，欲起慙筋力。客堂叙節改，具物對羈束。
石暄蕨芽紫，渚秀蘆筍綠。巴稼紛未稀，微麥早向熟。
悠悠日動江，漠漠春辭木。臺郎選才俊，自顧亦已極。
前輩聲名人，埋沒何所得。居然縮章綬，受性本幽獨。

平生憇息地，必種數竿竹。事業只濁醪，營葺但草屋。
上公有記者，累奏資薄祿。王憂豈濟時，身遠彌曠職。
循文廟筭正，獻可天衢直。尚想趨朝廷，毫髮裨社稷。
形骸今若是，進退委行色。

遣興

天寶十四載十一月公避賊往白水至乾元二年冬爲三年此詩作於其後

蓬生非無根，漂蕩隨高風。天寒落萬里，不復歸本叢。
客子念故宅，三年門巷空。悵望但烽火，戎車滿關東。
生涯能幾何，常在羈旅中。

白水縣崔少府高齋三十韻

公舅崔十九時尉白水縣天寶十五載夏
公自奉先來依舅氏而作

客從南縣來浩蕩無與適旅食白日長况當朱炎赫
高齋坐林杪信宿遊行間清晨陪躋攀傲睨俯峭壁
崇岡相枕帶曠野懷咫尺始知賢主人贈此遣愁寂
危堦根青冥層氷生浙瀝上有無心雲下有欲落石
泉聲聞復息動靜隨所激鳥呼藏其身有似懼彈射
吏隱適情性茲焉其窟宅白水見舅氏諸翁乃僊伯
杖藜長松陰作尉窮谷僻爲我炊雕胡逍遙展良覲

坐久風頗怒晚來山更碧相對十丈蛟歛翻盤澗折
何得空裏雷殷殷尋地脉煙氛藹茜翠魍魎森慘戚
崑崙崆峒顛迴首如不隔前軒頽反照巉絕華嶽赤
兵氣漲林巒川光雜鋒鏑知是相公軍鐵馬雲霧積
玉觴淡無味胡羯豈強敵長歌激屋梁淚下流衽席
人生半哀樂天地有順逆慨彼萬國夫休明備征狄
猛將紛填委廟謀畜長策東郊何時開帶甲且未釋
欲告清宴疲難拒幽明迫三嘆酒食傍何由似平昔
兩當縣吳十侍御江上宅

兩當縣以大散關與嘉陵江地勢險隘相

當故名兩當乾元二年公自秦州西至同
谷道經兩當而作

寒城朝煙淡山谷落葉赤陰風千里來吹汝江上宅
鷓鴣號枉渚日色傍阡陌借問持斧翁幾年長沙客
哀哀失木狘矯矯避弓鬪亦知故鄉樂未敢思宿昔
昔在鳳翔都共通金閨籍天子猶蒙塵東郊暗長戟
兵家忌間諜此輩常接跡臺中領舉劾君必慎剖析
不忍殺無辜所以分黑白上官權許與失意見遷斥
仲尼其旅人向子識損益朝廷非不知閉口休嘆息
余時忝諍臣丹陛實咫尺相看受狼狽至此難塞責

行邁心多遠出門無與適於公負明義惆悵頭更白
赤谷西崦人家

秦州有崦嵫山在赤谷之西曹操與劉備
戰於此谷川水爲之丹因號曰赤谷乾元
元年公貶爲華州司功屬關內饑亂遂棄
官之秦州宿于赤谷西崦人家而作

躋險不自安出郊已清目溪廻日氣暖逕轉山田熟
鳥雀依茅茨藩籬帶松菊如何武陵暮欲問桃源宿
秋行官張望督促東渚耗稻向畢清晨遣女
奴阿稽豎子阿段往問

行官行田之官張望行官姓名耗去苗間
草也向畢行田將完時也女奴小女使豎
子小童子

東渚雨今足，佇聞粳稻香。上天無偏頗，蒲稗各自長。
人情見非顛，田家戒其荒。功夫競搢搢，除草置岸傍。
穀者命之本，客居安可忘。青春具所務，勤墾免亂常。
吳牛力容易，並驅勇莫當。豐苗亦已穢，雲水照方塘。
有生固蔓延，靜一資隄防。督領不無人，提攜頗在綱。
荆揚風土暖，肅肅候微霜。尚恐王守疎，用心未足臧。
清朝遣婢僕，寄語踰崇岡。西成聚必散，不獨陵我倉。
豈要仁里譽，感此亂世忙。北風吹蒹葭，蟋蟀近中堂。
荏苒百工休，鬱紆遲暮傷。

行官張望補稻畦水歸

大曆二年冬，公未遷東屯時作。是年秋公
始自灤西遷居。

東屯大江北，百頃平若案。六月青稻多，千畦碧泉亂。
種秧適云已，引溜加漑灌。更僕往方塘，決渠當斷岸。
公私各地著，浸潤無天旱。王守問家臣，分明見溪畔。
芊芊爛翠羽，剌剌生銀漢。鷗鳥鏡裏來，關山雪中看。
秋菰成黑米，精鑿傳白粲。玉粒足晨炊，紅鮮任霞散。

終然添旅食作苦期壯觀遺穗及衆多我倉戒滋蔓

到村 排律附

詩云老去參戎幕當是廣德二年秋作

碧澗雖多雨秋沙先少泥蛟龍引子過荷芰逐花低
老去參戎幕歸來散馬蹄稻梁湏就列榛草卽相迷
蓄積思江漢頑疎惑町畦暫酬知己分還入故林棲

七言古

居室類

柘木爲風雨所拔嘆

倚江柘樹草堂前故老相傳二百年誅茅卜居總爲

此五月髣髴聞寒蟬東南飄風動地至江翻石走流
雲氣幹排雷雨猶力爭根斷泉源豈天意滄波老樹
性所愛浦上童童一青葢野客頻留懼雪霜行人不
過聽竽籟虎倒龍顛委榛棘淚痕血點垂曾臆我有
新詩何處吟草堂自此無顏色

寄柏學士林居

大曆元年夔州作

自胡之反持干戈天下學士亦奔波歎彼幽棲載典
籍蕭然暴露依山阿青山萬里靜散地白雨一洗空
垂蘿亂代飄零予到此古人成敗子如何荆揚春冬

異風土巫峽日夜多雲雨赤葉楓林百舌鳴黃泥野
岸天鷄舞盜賊縱橫甚密邇形神寂寞其辛苦幾時
高議排金門各使蒼生有環堵

別李秘書始興寺所居

時秘書坐事縛居寺

李秘書有二其一李十五秘書其一李八
秘書此在夔州別李十五秘書

不見秘書心若失及見秘書失心疾安為動主理信
然我獨覺子神克實重聞西方止觀經老身古寺風
泠泠妻兒待我且歸去他日杖藜來細聽

五言古

世族類

奉贈李八丈曠判官

我丈時英特宗枝神堯後珊瑚市則無駮驥人得有
早年見標格秀氣衝星斗事業富清機官曹正獨守
頃來樹嘉政皆已傳眾口艱難體貴安冗長吾敢取
區區猶歷試炯炯更持久討論實解頤操割紛應手
篋書積諷諫宮闕限奔走入幕未展材秉鈞孰為偶
所親問淹泊况愛惜衰朽垂白辭南翁委身希北叟
真成窮轍鮒或似喪家狗秋枯洞庭石風颯長沙柳
高興激荆衡知音為回首

別李義

李義與公爲中表親

神堯十八子十七王其門道國及舒國實維親弟昆
中外貴賤殊余亦忝諸孫丈人嗣王業之子白玉溫
道德繼德業請從丈人論丈人領宗卿肅穆古制敦
先朝納諫諍直氣橫乾坤子建文章壯河間經術存
溫克富詩禮骨清慮不喧洗然遇知己談論淮湖奔
憶昔初見時小襦繡芳蓀長成忽會面慰我久疾蒐
三峽春冬交江山雲霧昏正宜且聚集恨此當離樽
莫怪執盃遲我衰涕唾煩重問子何之西上岷江源
願子少干謁蜀都足戎軒誤失將帥意不如親故恩
少年早歸來梅花已飛翻努力慎風水豈惟數盤餐
猛虎臥在岸蛟螭出無痕王子自愛惜老夫困石根
生別古所嗟發聲爲爾吞

送李校書二十六韻

秘書郎屬秘書監掌讐校典籍爲文士良
選位正九品校書名舟字公度隴西人父
岑嘗爲水部郎官舟有文學高才俊辯爲
虔州刺史嘗與妹書曰釋迦生中國設教
如周孔周孔生西方設教如釋迦天堂無

則已有則君子登地獄無則已有則小人入立言如此其人可知公故稱道之

代北有豪鷹生子毛盡赤渥洼騏驎兒尤異是龍脊李舟名父子清峻流輩伯人間好妙年不必須白哲十五富文史十八足賓客十九授校書二十聲輝赫眾中每一見使我潛動魄自恐二男兒辛勤養無益乾元元年春萬姓始安邑舟也衣綵衣告我欲遠適倚門固有望歛衽就行役南登吟白華已見楚山碧藹藹咸陽都冠蓋日雲積何時太夫人堂上會親戚汝翁草明光天子正前席歸期豈爛漫別意終感激

顧我蓬室姿謬通金閨籍小來習性懶晚歲慵轉劇每愁悔吝作如覺天地窄美君齒髮新行已能夕惕臨岐意頗切對酒不能喫迴身視綠野慘澹如荒澤老鴈春忍饑哀號待枯麥時哉高飛燕絢練新羽翮長雲濕褒斜漢水饒巨石無令軒車遲衰疾悲宿昔

贈特進汝陽王二十韻

以下排律附

睿宗長子名憲以讓天位與玄宗故謚曰讓皇帝讓皇子名璿封汝陽位特進在三公下漢官儀曰諸侯功德優盛朝廷所敬異者賜位特進此指璿而言

特進羣公表天人夙德升霜蹄千里駿風翮九霄鵬
服禮求毫髮推忠忘寢興聖情常有眷朝退若無憑
仙醴來浮蟻奇毛或賜鷹清關塵不雜中使日相乘
晚節嬉遊簡平居孝義稱自多親棣萼誰敢問山陵
學業醇儒富辭華哲匠能筆飛鸞聳立草罷鳳騫騰
精理通談笑忘形向友朋寸腸堪繾綣一諾豈驕矜
已忝歸曹植何知對李膺招要恩屢至崇重力難勝
披霧初歡夕高秋爽氣澄樽壘臨極浦鳧鴈宿張燈
花月窮遊宴炎天避鬱蒸硯寒金井水簷動玉壺冰
瓢飲唯三逕巖栖異一塍謬特蠡測海况挹酒如澠

鴻寶寧全秘丹梯庶可凌淮王門有客終不愧孫登

奉漢中王手札

漢中王名瑀以事貶蓬州刺史路梗不得
歸京今將出峽作詩報公而公答此

國有乾坤大王今叔父尊剖符來蜀道歸蓋取荆門
峽險通舟過江長注海奔主人留上客避暑得名園
前後緘書報分明饌玉恩天雲浮絕壁風竹在華軒
已覺良宵永何看駭浪翻入期朱邸雪朝旁紫微垣
枚乘文章老河間禮樂存悲秋宋玉宅失路武陵源
淹泊俱崖口東西異石根夷音迷咫尺鬼物傍黃昏

犬馬誠為戀，狐狸不足論。從容草奏罷，宿昔奉清樽。

贈虞十五司馬

虞十五，虞世南之玄孫，司馬官名在浣花。

溪時作。

遠師虞秘監，今喜識玄孫。形象丹青逼，家聲器宇存。
淒涼憐筆勢，浩蕩問辭源。爽氣金天豁，清談玉露繁。
佇鳴南嶽鳳，欲化北溟鯤。交態知浮俗，儒流不異門。
過逢連客位，日夜倒芳樽。沙岸風吹葉，雲江月上軒。
百年嗟已半，四座敢辭喧。書籍終相與，青山隔故園。
同豆盧峯貽王客李員外賢子裴知字韻

按唐宰相表，豆盧本姓慕容氏，北人謂歸義為豆盧，因賜以為氏。居昌黎棘城。又唐百官志，王客司設郎中員外郎各一人，掌二王後及諸蕃朝見之事，屬禮部。

鍊金歐冶子，噴玉大宛兒。符彩高無敵，聰明達所為。
夢蘭他日應，折桂早年知。爛熳通經術，光芒刷羽儀。
謝庭瞻不遠，潘省會於斯。唱和將雛曲，田翁號鹿皮。

七言古

世族類

哀王孫

安祿山驚潼關玄宗倉卒西幸夜半出延
秋門諸嗣王及公主在外者皆不及從其
後多爲祿山所屠鮮有脫者此詩記而哀
之

長安城頭頭白烏夜飛延秋門上呼又向人家啄大
屋屋底達官走避胡金鞭斷折九馬死骨肉不待同
馳驅腰下寶玦青珊瑚可憐王孫泣路隅問之不肯
道姓名但道困苦乞爲奴已經百日窺荆棘身上無
有完肌膚高帝子孫盡隆準龍種自與常人殊豺狼
在邑龍在野王孫善保千金軀不敢長語臨交衢且

爲王孫立斯須昨夜春風吹血腥東來橐駝滿舊都
朔方健兒好身手昔何勇銳今何愚竊聞太子已傳
位聖德北服南單于花門勞面請雪耻慎勿出口他
人狙哀哉王孫慎勿踈五陵佳氣無時無

寄狄明府

梁公會孫我姨弟不見十年官濟濟大賢之後竟陵
遲浩蕩古今同一體比看伯叔四十人有才無命百
寮底今者兄弟一百人幾人卓絕秉周禮在汝更用
文章爲長兄白眉復天啓汝門請從曾公說太后當
朝多巧計狄公執正在末年濁河中不污清濟國嗣

初將付諸武公獨廷諍守丹陛禁中冊決詔房陵前
朝長老皆流涕太宗社稷一朝正漢官威儀重昭洗
時危始識不世才誰謂荼苦甘如薺汝曹又宜裂土
食身使門戶多旌棨胡為飄泊岷漢間干謁王侯頗
歷詆况乃山高水有波秋風蕭蕭露泥泥虎之饑下
巉巖蛟之橫出清泚早歸來黃汗人衣眼易眯

五言古

宗族類

得舍弟消息

其弟在河南而八方西去在華州作

風吹紫荆樹色與春庭暮花落辭故枝風回反無處
骨肉恩書重漂泊難相遇猶有淚成河經天復東注

示從孫濟

濟字應物仕終給事中京兆尹所居在長
安

平明跨驢出未知適誰門權門多噂沓且復尋諸孫
諸孫貧無事宅舍如荒村堂前自生竹堂後自生萱
萱草秋已死竹枝霜不蕃淘米少汲水汲多井水渾
刈葵莫放手放手傷葵根阿翁懶墮久覺兒行步奔
所來為宗族亦不為盤飧小人利口實薄俗難具論

勿受外嫌猜同姓古所敦

遠懷舍弟穎觀等

下排律附

大曆三年正月旦日作

陽翟空知處荆南近得書積年仍遠別多難不安居
江漢春風起冰霜昨夜除雲天猶錯莫花萼尚蕭疎
對酒都疑夢吟詩正憶渠舊時元日會鄉黨羨吾廬
續得觀書迎就當陽居止正月中旬定出三

峽

三峽正峽西陵峽歸鄉峽並稱三峽連山
七百里畧無斷處自非亭午夜分不見日
月其峯並出青雲西陵峽今名瞿塘歸鄉
今名南鄉三峽俱在巫山縣時公在夔州
故謂在正月中旬定出三峽往觀之所在
也

自汝到荆府書來數喚吾頌椒添諷詠禁火卜歡娛
舟楫因人動形骸用杖扶天旋夔子峽春近岳陽湖
發日排南喜傷神散北吁飛鳴還接翅行序密銜蘆
俗薄江山好時危草木蘇馮唐雖晚達終覲在皇都

遣興

至德元載陷賊中作

本詩分類 卷之二 三
驥子好男兒，前年學語時。問人知客姓，誦得老夫詩。
世亂憐渠小，家貧仰母慈。鹿門攜不遂，鴈足繫難期。
天地軍麾滿，山河戰角悲。僮歸免相失，見日敢辭遲。
得家書

至德二載在鳳翔行在作公時家尚寄居

鄜州

去憑遊客寄，來爲附家書。今日知消息，他鄉且舊居。
熊兒幸無恙，驥子最憐渠。臨老羈孤極，傷時會合疎。
二毛趨帳殿，一命侍鸞輿。北闕妖氛滿，西郊白露初。
涼風新過鴈，秋雨欲生魚。農事空山裏，春言終荷鋤。

宗武生日

寶應元年秋在梓州時作是時公家在成
都府

小子何時見，高秋此日生。自從都邑語，已伴老夫名。
詩是吾家事，人傳世上情。熟精文選理，休覓綵衣輕。
凋瘵筵初秩，欹斜坐不成。流霞分片片，涓滴就徐傾。
又示宗武

廣德二年作想宗武年十四歲矣

覓句新知律，攤書解滿床。試吟青玉案，莫帶紫羅囊。
假日從時飲，明年共我長。應須飽經術，已似愛文章。

杜詩分數 卷之二 五
十五男兒志三千弟子行曾參與游夏達者得升堂
七言古

宗族類

寄從孫崇簡

嗟峨白帝城東西南有龍湫北虎溪吾孫騎曹不記
馬業學戶鄉多養鷄龐公隱時盡室去武陵春樹他
人迷與汝林居未相失近身藥裏酒長攜牧叟樵童
亦無賴莫令斬斷青雲梯

五言古

姻戚類

敬寄族弟唐十八使君

稱唐杜族弟

巫山宴別之後唐寄書於公故公簡此是
時尚未出峽大曆三年公纔下峽

與君陶唐後盛族多其人聖賢冠史籍枝派羅源津
在今最磊落巧偽莫敢親介立寔吾弟濟時肯殺身
物白諱受玷行高無汚真得罪永泰末放之五湖濱
鸞鳳有鍛翮先儒曾抱麟雷霆霹長松骨大却生筋
一失不足傷念子孰自珍泊舟楚宮岸戀闕浩酸辛
除名配清江厥土巫峽隣登陸將首途筆札枉所申
歸朝跼病肺叙舊思重陳春風洪濤壯谷轉頗彌旬

我能汎中流，擔突鼉獺，嗔長年已省柁，慰此貞良臣。
送重表姪王砮評事使南海

水深至心曰砮，卽讀曰厲。大曆四年春在岳州作。

我之曾老姑，爾之高祖母。爾祖未顯時，歸爲尚書婦。
隋朝大業末，房杜俱交友。長者來在門，荒年自餬口。
家貧無供給，客位但箕帚。俄頃羞頗珍，寂寥人散後。
入怪鬢髮空，吁嗟爲之久。自陳剪髻鬢，膏市克盃酒。
上云天下亂，宜與英俊厚。向竊窺數公，經綸亦俱有。
次問最少年，虬髯十八九。子等成大名，皆因此人手。

下云風雲合龍虎，一吟吼願展大夫雄。得辭兒女醜，
秦王時在坐，真氣驚戶牖。及乎貞觀初，尚書踐台斗。
夫人常肩輿，上殿稱萬壽。六宮師柔順，法則化妃后。
至尊均嫂叔，盛事傳不朽。鳳雛無凡毛，五色非爾曹。
往者胡作逆，乾坤沸噉噉。吾客在馮翊，爾家同遁逃。
爭奪至徒步，塊獨委蓬蒿。逗留熱爾腸，十里却呼號。
自下所騎馬，右持腰間刀。左牽紫遊韁，飛走使我高。
苟活到今日，寸心銘佩牢。亂離又聚散，宿昔恨滔滔。
水花笑白首，春草隨青袍。廷評近要津，節制收英髦。
北驅漢陽傳，南汎上瀧舫。家聲肯墜地，利器當秋毫。

番禺親賢領籌運神功操犬夫出盧宋寶貝休脂膏
洞王降接武海湖舶千艘我欲就丹砂跋涉覺身勞
安能陷糞土有志乘鯨鼇或駮鸞騰天聊作鶴鳴臯

閩州東樓筵奉送十一舅往青城縣得昏字

層城有高樓制古丹雘存迢迢百餘尺豁達開四門
雖有車馬客而無人世喧遊目俯大江列筵慰別寬
是時秋冬交節往顏色昏天寒鳥獸休霜露在草根
今我送舅氏萬感集清鎮豈伊山川間迴首盜賊繁
高賢意不暇王命久崩奔臨風欲慟哭聲出已復吞

佳人

詩邶風簡兮篇彼美人兮西方之人兮言
賢者有佳美之德而不見用故此詩亦以
佳人爲喻以見當時踈斥老成而喜用新
進也

絕代有佳人幽居在空谷自云良家子零落依草木
關中昔喪敗兄弟遭殺戮官高不足論不得收骨肉
世情惡衰歇萬事隨轉燭夫婿輕薄兒新人美如玉
合昏尚知時鴛鴦不獨宿但見新人笑那聞舊人哭
在山泉水清出山泉水濁侍婢賣珠廻牽蘿補茅屋
摘花不插髮采栢動盈掬天寒翠袖薄日暮倚脩竹

新婚別

先王之政新婚者暮年不役此詩所怨盡其常分而能不忘禮義也

兔絲附蓬麻引蔓故不長嫁女與征夫不如棄路傍
結髮為妻子席不煖君床暮婚晨告別無乃太匆忙
君行雖不遠守邊赴河陽妾身未分明何以拜姑嫜
父母養我時日夜令我藏生女有所歸鷄狗亦得將
君今死生地沉迫痛中腸誓欲隨君往形勢反蒼黃
勿為新婚念努力事戎行婦人在軍中兵氣恐不揚
自嗟貧家女久致羅襦裳羅襦不復施對君洗紅粧

仰視百鳥飛大小必雙翔人事多錯迕與君永相望

王閬州筵奉酬十一舅惜別之作

下排律附

公母鄭氏生母崔氏十一舅乃是崔氏此

在閬州時作

萬壑樹聲滿千崖秋氣高浮舟出郡郭別酒寄江濤
良會不復久此生何太勞窮愁但有骨羣盜尚如毛
吾舅惜分手使君寒贈袍沙頭暮黃鶴失侶自哀號

奉送二十三舅錄事之攝郴州

二十三舅崔備也錄事官名唐制諸州設

錄事參軍掌正違失蒞符印

賢良歸盛族，吾舅盡知名。徐庶高交友，劉牢出外甥。
泥塗豈珠玉，環堵但柴荆。衰老悲人世，驅馳厭甲兵。
氣春江上別，淚血渭陽情。舟鷁排風影，林鳥反哺聲。
永嘉多北至，句漏且南征。必見公侯復，終聞盜賊平。
郴州頗涼冷，橘井尚淒清。從役何蠻貊，居官志在行。
贈比部蕭郎中十兄

蕭郎中公從姑子比部屬刑部

有美生人傑，由來積德門。漢朝丞相系，梁日帝王孫。
蘊藉爲郎久，魁梧秉哲尊。詞華傾後輩，風雅藹孤鶩。
宅相榮姻戚，兒童惠討論。見知真自幼，謀拙愧諸昆。

漂蕩雲天闊，沉埋日月奔。致君時已晚，懷古意空存。
中散山陽鍛，愚公野谷村。寧紆長者轍，歸老任乾坤。
送大理封主簿五郎親事不合却赴通州王
簿前閬州賢子，余與王簿平章鄭氏女子垂
欲納采，鄭氏伯父京書至，女子已許他族親
事遂停

大曆三年未出峽時作

禁鬻去東床，趨庭赴北堂。風波空遠涉，琴瑟幾虛張。
渥水出騏驎，崑山生鳳凰。兩家誠款款，中道許蒼蒼。
頗謂秦晉匹，從來王謝郎。青春動才調，白首缺輝光。

玉潤終孤立珠明得暗藏餘寒折花卉恨別滿江鄉
五言古

仙釋類

昔遊

此詩殆是記昔時遊齊宋中事當在乾元
二年秦州作

昔謁華蓋君綠袍崑玉脚人棺已上天白日亦寂寞
暮升艮岑頂巾几猶未却弟子四五人入來淚俱落
余時遊名山發軔在遠壑良覲違夙願含凄向寥廓
林昏罷幽磬竟夜伏石閣王喬下天壇微月映皓鶴

晨溪響虛駛歸徑行已昨豈辭青鞋朕悵望金七藥
東蒙赴舊隱尚憶同志樂伏事董先生於今獨蕭索
胡為客關塞道意久衰薄妻子亦何人丹砂負前諾
雖悲髮變鬢未憂筋力弱杖藜望清秋有興入廬霍

幽人

易履卦九二履道坦坦幽人貞吉本義曰
剛中在下無應於上故為履道平坦幽獨
守貞之象幽人履道而遇其占則貞吉矣
此以比幽隱之士言

孤雲亦羣遊神物有所歸麟鳳在赤霄何當一來儀

往與惠詢輩，中年滄洲期。天高無消息，棄我忽若遺。
內懼非道流，幽人在瑕疵。洪濤隱語笑，鼓拖蓬萊池。
崔嵬扶桑日，照曜珊瑚枝。風帆倚翠蓋，暮把東皇衣。
嚙嗽元和津，所思煙霞微。知名未足稱，局促商山芝。
五湖復浩蕩，歲暮有餘悲。

寄司馬山人十二韻

關內昔分袂，天邊今轉蓬。馳驅不可說，談笑偶然同。
道術曾留意，先生早擊蒙。家家迎薊子，處處識壺公。
長嘯峨眉北，潛行玉壘東。有時騎猛虎，虛室使仙童。
髮少何勞白，顏衰肯更紅。望雲悲轆轤，畢景美冲融。
喪亂形仍役，淒涼信不通。懸旌要路口，倚劔短亭中。
永作殊方客，殘生一老翁。相哀骨可換，亦遣馭清風。
貽阮隱居

阮名昉

陳畱風俗衰，人物世不數。塞上得阮生，迥繼先父祖。
貧知靜者性，自益毛髮古。車馬入隣家，蓬蒿翳環堵。
清詩近道要，識字用心苦。尋我草徑微，寒裳踏寒雨。
更議居遠村，避喧甘猛虎。足明箕穎客，榮貴如糞土。
與李十二白同尋范十隱居

天寶初李白客游會稽與吳筠隱于剡中

玄宗詔筠赴京師筠薦之于朝召與筠俱
待詔翰林久之以沉醉斥去乃浪跡江湖
崔宗之謫官金陵與白詩酒倡和開元二
十四年杜公遊齊趙與白同至齊交故同
尋范十於交又白之父爲任城尉因家焉
李侯有佳句往往似陰鏗余亦東蒙客憐兄如弟兄
醉眠秋共被携手日同行更想幽期處還尋北郭生
入門高興發侍立小童清落景聞寒杵屯雲對古城
向來吟橘頌誰與討尊羹不願論簪笏悠悠滄海情
西枝村尋置草堂地夜宿贊公土室二首

贊公謫居秦州乾元二年七月公自華之
秦意欲居此故尋置草堂之地西枝村在
秦近郭有巖竇之勝杉栝之利贊常稱之
公卒以關輔饑棄之同谷當是其年秋晚
作

出郭眄細岑披榛得微路溪行一流水曲折方屢渡
贊公湯休徒好靜心迹素昨枉霞上作盛論巖中趣
怡然共携手恣意同遠步捫蘿澁先登陟巘眩及顧
要求陽岡暖若涉陰嶺沍惆悵老大藤沉吟屈蟠樹
卜居意未展杖策廻且暮層巔餘落日草蔓已多露

其二

天寒鳥已歸，月出山更靜。土室延白光，松門耿疎影。
躋攀倦日短，語樂寄夜永。明燃林中薪，暗汲石底井。
大師京國舊，德業天機秉。從來支許遊，興趣江湖迥。
數奇謫關塞，道廣存箕穎。何知戎馬間，復接塵事屏。
幽尋豈一路，遠色有諸嶺。晨光稍朦朧，更越西南頂。

寄贊上人

摩訶般若經，何名上人。佛言若菩薩，一心
行阿耨菩提心，不散亂，是名上人。增一經
云：處世有過，能改者爲上人。當是乾元二

年秦州作

一昨陪錫杖，卜隣南山幽。年侵腰脚衰，未便陰崖秋。
重岡北面起，竟日陽光留。茅屋買兼土，斯焉心所求。
近聞西枝西，有谷杉黍稠。亭午頗和暖，石田又足收。
當期塞雨乾，宿昔齒疾瘳。徘徊虎穴上，面勢龍泓頭。
柴荆具茶茗，徑路通林丘。與子成二老，來往亦風流。
別贊上人

公以關輔饑，乃去秦州，故與贊公爲別。

百川日東流，客去亦不息。我生苦飄蕩，何時有終極。
贊公釋門老，放逐來上國。還爲世塵嬰，頗帶憔悴色。

楊枝晨在手，豆子雨已熟。是身如浮雲，安可限南北。
異縣逢舊友，初欣寫胸臆。天長關塞遠，歲暮饑凍逼。
野風吹征衣，欲別向曛黑。馬嘶思故樞，歸鳥盡斂翼。
古來聚散地，宿昔長荆棘。相看俱衰年，出處各努力。
謁文公上方

上方以言其居之可樂也。佛書有上方世界。

野寺隱喬木，山僧高下居。石門日色異，絳氣橫扶疎。
窈窕入風磴，長蘿紛卷舒。庭前猛虎臥，遂得文公廬。
俯視萬家邑，煙塵對塔除。吾師雨花外，不下十年餘。
長者自布金，禪龕只晏如。大珠脫玷翳，白月當空虛。
甫也南北人，蕪漫少耘鋤。又遭詩酒污，何事忝簪裾。
王侯與蠅蟻，同盡隨丘墟。願聞第一義，迴向心地初。
金篦刮眼膜，價重百車渠。無生有汲引，茲理儻吹噓。
大雲寺贊公房四首

其二
燈影照無睡，心清聞妙香。夜深殿突兀，風動金琅璫。
天黑閉春院，地清棲暗芳。玉繩回斷絕，織鳳森翱翔。
梵放時出寺，鐘殘仍殷床。明朝在沃野，苦見塵沙黃。

童兒汲井華，慣捷瓶上手。霑灑不濡地，掃除似無帚。

明霞爛複閣，霽霧塞高牖。側塞被徑花，飄飄委墀柳。
艱難世事迫，隱遁佳期後。晤語契深心，那能摠鉗口。
奉辭還杖策，暫別終回首。泱泱泥污人，聽聽國多狗。
既未免羈絆，時來憇奔走。近公如白雪，執熱煩何有。

其三

心在水精域，衣霑春雨時。洞門盡徐步，深院果幽期。
到扉開復閉，撞鐘齊及茲。醍醐長發性，飲食過扶衰。
把臂有多日，開懷無愧辭。黃鶯度結構，紫鴿下梁楸。
愚意會所適，花邊行自遲。湯休起我病，微笑索題詩。

其四

細軟青絲履，光明白氎巾。深藏供老宿，取用及吾身。
自顧轉無趣，交情何尚新。道林才不世，惠遠德過人。
雨瀉暮簷竹，風吹春井芹。天陰對圖畫，最覺潤龍鱗。
遊龍門奉先寺

龍門在今河南府伊闕山而俗名龍門山
是詩乃公開元二十四年後游東都作

已從招提遊，更宿招提境。陰壑生靈籟，月林散清影。
天闕象緯逼，雲臥衣裳冷。欲覺聞晨鐘，令人發深省。

山寺

章菑後同遊，得開字。章菑後名葵，卽爲嚴

武所殺者

野寺根石壁，諸龕遍崔嵬。前佛不復辨，百身一莓苔。
唯有古殿存，世尊亦塵埃。如聞龍象泣，足令信者哀。
使君騎紫馬，捧擁從西來。樹羽靜千里，臨江久徘徊。
山僧衣藍縷，告訴棟梁摧。公爲顧兵徒，咄嗟檀施開。
吾知多羅樹，却倚蓮花臺。諸天必歡喜，鬼物無嫌猜。
以茲撫士卒，孰曰非周才。窮子失淨處，高人憂禍胎。
歲晏風破肉，荒林寒可迴。思量入道苦，自晒同嬰孩。

同諸公登慈恩寺塔

公自註時高適薛據先有作慈恩寺唐高
宗爲文德皇后建故以慈恩爲名寺西院
有浮圖六級高三百尺唐進士旣捷列名
於慈恩寺塔謂之題名此塔永徽三年沙

門玄奘所立

高標跨蒼穹，烈風無時休。自非曠士懷，登茲翻百憂。
方知象教力，足可追冥搜。仰穿龍蛇窟，始出枝撐幽。
七星在北戶，河漢聲西流。羲和鞭白日，少昊行清秋。
泰山忽破碎，涇渭不可求。俯視但一氣，焉能辨皇州。
迴首叶虞舜，蒼梧雲正愁。惜哉瑤池飲，日晏崑崙丘。
黃鵠去不息，哀鳴何所投。君看隨陽鴈，各有稻梁謀。

時序類

古詩排律之參伍者從類而彙次之也後放此

春歸

此言歸當春時

苔徑臨江竹，茅簷覆地花。
別來頻甲子，歸到忽春華。
倚杖看孤石，傾壺就淺沙。
遠鷗浮水靜，輕燕受風斜。
世路雖多梗，吾生亦有涯。
此身醒復醉，乘興即歸家。

傷春五首

楚辭招魂篇，目極千里兮傷春心。故以傷春為題。時公避亂在閬中而作。

天下兵雖滿，春光日自濃。
西京疲百戰，北闕任羣兇。

關塞二千里，煙花一萬重。
蒙塵清露急，御宿且誰供。
殷復前王道，周遷舊國容。
蓬萊足雲氣，應合總從龍。

其二

鷲入新年語，花開滿故枝。
天清風卷幔，草碧水通池。
牢落官軍速，蕭條萬事危。
鬢毛原自白，淚點向來垂。
不是無兄弟，其如有別離。
巴山春色靜，北望轉逶迤。

其三

日月還相關，星辰屢合圍。
不成誅執法，焉得變危機。
大角纏兵氣，鈎陳出帝畿。
煙塵昏御道，耆舊把天衣。
行在諸軍闕，來朝大將稀。
賢多隱屠釣，王肯載同歸。

其四

再有朝廷亂難知消息真近傳王在洛復道使歸秦
奪馬悲公主登車泣貴嬪蕭關迷北上滄海欲東巡
敢料安危體猶多老大臣豈無稽紹血霑灑屬車塵

其五

聞說初東幸孤兒却走多難分太倉粟競棄魯陽戈
胡虜登前殿王公出御河得無中夜舞誰憶大風歌
春色生烽燧幽人泣薜蘿君臣重脩德猶足見時和

夏日嘆

乾元二年三月丁亥以旱降死罪流以下

原之四月詔減常膳服御四月癸亥以天
旱徙市雩祀祈雨

夏日出東北陵天經中街朱光徹厚地鬱蒸何由開
上蒼久無雷無乃號令乖雨降不濡物良田起黃埃
飛鳥苦熱死池魚涸其涯萬人尚流冗舉目唯蒿萊
至今大河北盡作虎與豺浩蕩想幽薊王師安在哉
對食不能食我心殊未諧眇然貞觀初難與數子偕

夏夜嘆

永日不可暮炎蒸毒我腸安得萬里風飄颻吹我裳
昊天出華月茂林延踈光仲夏苦夜短開軒納微涼

虛明見纖毫，羽蟲亦飛揚。物情無巨細，自適固其常。
念彼荷戈士，窮年守邊疆。何由一洗濯，執熱互相望。
竟夕擊刁斗，喧聲連萬方。青紫雖被體，不如早還鄉。
北城悲笳發，鶴鶴號且翔。况復煩促倦，激烈思時康。
毒熱寄簡崔評事十六弟

大曆元年，公在夔州。是年春旱，至六月始

雨，則夔州七月猶未雨。此詩當是其時作。

大暑運金氣，荆揚不知秋。林下有塌翼，水中無行舟。
千室但掃地，閉關人事休。老夫轉不樂，旅次兼百憂。
腹蛇暮偃蹇，空床難暗投。炎宵惡明燭，况乃懷舊丘。

開襟仰內第，執熱露白頭。束帶負芒刺，樓居成阻脩。
何當清霜飛，會子臨江樓。載聞大易義，諷興詩家流。
醞藉異時葷，檢身非苟求。皇皇使臣體，信是德業優。
楚材擇杞梓，漢苑歸驂驪。短章達我心理，爲識者籌。
七月三日，亭午已後較熱，退晚加小涼，穩睡。
有詩因論壯年樂事，戲呈元二十、一曹長。

永泰二年三月不雨，至六月始雨。公時在

夔州，此詩當是其年作。

今茲商用事，餘熱亦已未。衰年旅炎方，生意從此活。
亭午減汗流，北鄰耐人聒。晚風爽烏區，筋力蘇摧折。

木言分婁
卷之二
三頁
閉目踰十旬，大江不止渴。退藏恨雨師，健步聞旱魃。
園蔬抱金玉，無以拱採掇。密雲雖聚散，徂暑終衰歇。
前聖春焚巫，武王親救暵。陰陽相主客，時序遞回斡。
灑落唯清秋，昏霾一空濶。蕭蕭紫塞鴈，南向欲行列。
歛思紅顏日，霜露凍塔閼。胡馬挾彫弓，鳴弦不虛發。
長鉞逐狡兔，突羽當滿月。惆悵白頭吟，蕭條游俠窟。
臨軒望山閣，縹緲安可悅。高人煉丹砂，未念將朽骨。
少壯跡頗疎，歡樂曾倏忽。杖藜風塵際，老醜難剪拂。
吾子得神仙，本是池中物。賤夫美一睡，煩促嬰詞筆。
立秋後題

公爲華州司功，值關輔饑，棄去客秦州。當
是乾元二年，欲棄官時作也。

日月不相饒，節叙昨夜隔。玄蟬無停號，秋燕已如客。
平生獨往願，惆悵年半百。罷官亦由人，何事拘形役。
秋雨院中有作

巖鄭公武奏公爲參謀時在幕下院中作
山雲行絕塞，大火復西流。飛雨動華屋，蕭蕭梁棟秋。
窮途愧知己，暮齒借前籌。已費清晨謁，那成長者謀。
解衣開北戶，高枕對南樓。樹濕風涼進，江喧水氣浮。
禮寬心有適，節爽病微瘳。王將歸調鼎，吾還訪舊丘。

傷秋

大曆二年吐蕃寇靈州邠州京師戒嚴時

作

林僻來人少山長去鳥微
高秋收畫扇久客掩柴扉
懶慢頭時櫛艱難帶減圍
將軍思汗馬天子尚戎衣
白蔣風颯脆殷檉曉夜稀
何年滅豺虎似有故園歸

太歲日

大曆三年歲次戊申正月丙午朔則初三

日為戊申乃太歲日也

楚岸行將老巫山坐復春
病多猶是客謀拙竟何人

聞闔開黃道衣冠拜紫宸
榮光懸日月賜予出金銀
愁寂鴛鴦行斷參差虎穴鄰
西江元下蜀北斗故臨秦
散地逾高枕生涯脫要津
天邊梅柳樹相見幾回新

元日示宗武

大曆三年正月公出峽作

汝啼吾手戰吾笑汝身長
處處逢正月迢迢滯遠方
飄零還柏酒衰病只藜床
訓諭青衿子名慙白首郎
賦詩猶落筆獻壽更稱觴
不見江東第高歌淚數行

牽牛織女

牽牛出河西織女處其東
萬古永相望七夕誰見同

神光意難候，此事終朦朧。颯然精靈合，何必秋遂通。
亭亭新粧立，龍駕具曾空。世人亦爲爾，祈請走兒童。
稱家隨豐儉，白屋達公官。膳夫翊堂殿，鳴玉淒房櫳。
曝衣徧天下，曳月揚微風。蛛絲小人態，曲綴瓜果中。
初筵瀼重露，日出甘所終。嗟汝未嫁女，秉心鬱忡忡。
防身動如律，竭力機杼中。雖無姑舅事，敢昧織作功。
明明君臣契，咫尺或未容。義無棄禮法，恩始夫婦恭。
小大有佳期，戒之在至公。方圓苟齟齬，丈夫多英雄。

九日寄岑參

此詩只思岑生舊註謂君爲奸邪所蔽之

說恐非

出門復入門，雨脚但仍舊。所向泥活活，思君令人瘦。
沉吟坐秋軒，飯食錯昏晝。寸步曲江頭，難爲一相就。
吁嗟乎蒼生，稼穡不可救。安得誅雲師，疇能補天漏。
大明韜日月，曠野號禽獸。君子強逶迤，小人困馳驟。
維南有崇山，恐與川浸溜。是節東籬菊，紛披爲誰秀。
岑生多新語，性亦嗜醇酎。采采黃金花，何由滿衣袖。

九日

大曆二年夔州作

故里樊川菊，登高素滌源。他時一笑後，今日幾人存。

巫峽蟠江路終南封國門繫舟身萬里伏枕淚雙痕
爲客裁烏帽從兒具綠樽佳辰對羣盜愁絕更堪論

千秋節有感二首

太子誕日謂之千秋節唐玄宗以八月五
日生燕百僚於華萼相輝樓下百寮表請
以每年八月五日爲千秋節三公以下獻
鏡及承露囊玄宗爲天子亦稱千秋節此

公大曆四年在湖廣潭州作

自罷千秋節頻傷八月來先朝常宴會壯觀已塵埃
鳳紀編生日龍池塹劫灰湘川新涕淚秦樹遠樓臺

寶鏡羣臣得金吾萬國迴衢樽不重飲白首獨餘哀

其二

御氣雲樓敞含風綵仗高仙人張內樂王母獻宮桃
羅鞵紅藻艷金羈白雪毛舞階銜壽酒走索背秋毫
聖主他年貴邊心此日勞桂江流向北蒲眼送波濤

東屯月夜

大曆二年秋公在瀼西移居東屯當是其
年作瀼西在今夔州府東屯卽東瀼相去
亦不遠

抱疾漂萍老防邊舊穀屯春農親異俗歲月在衙門

青女霜風重，黃牛峽水喧。泥留虎鬪迹，月挂客愁村。
喬木澄稀影，輕雲倚細根。數驚聞雀噪，暫睡想猿蹲。
日轉東方白，風來北斗昏。天寒不成寢，無夢寄歸魂。

夢李白二首

李白坐永王，璘事當誅。郭子儀請解官贖罪，詔長流夜郎。會赦還潯陽，復坐事下江

州獄

死別已吞聲，生別常惻惻。江南瘴癘地，逐客無消息。
故人入我夢，明我長相憶。恐非平生竟，路遠不可測。
竟來楓林青，竟轉關塞黑。今君在羅網，何以有羽翼。

落月滿屋梁，猶疑照顏色。水深波浪濶，無使蛟龍得。

其二

浮雲終日行，遊子久不至。三夜頻夢君，情親見君意。
告歸常局促，苦道來不易。江湖多風波，舟楫恐失墜。
出門搔白首，苦負平生志。冠蓋滿京華，斯人獨顛顛。
孰云網恢恢，將老身反累。千秋萬歲名，寂寞身後事。

七言古

仙釋類

大覺高僧蘭若

蘭若僧居小於寺者。

巫山不見廬山遠，松林蘭若秋風晚。一老猶鳴日暮鐘，諸僧尚乞齋時飯。香爐峯色隱晴湖，種杏僊家近白榆。飛錫去年啼邑子，獻花何日許門徒。

時序類

春日戲題惱郝使君

時公在梓州郝使君在通泉縣

使君意氣凌青霄，憶昨歡娛常見招。細馬時鳴金騾裏，佳人屢出董嬌嬈。東流江水西飛燕，可惜春光不相見。願攜王趙兩紅顏，再聘肌膚如素練。通泉百里近梓州，請公一來開我愁。舞處重看花滿面，樽前還

有錦纏頭

秋風二首

秋風淅淅吹巫山，上牢下牢脩水關。吳檣楚柁牽百丈，暖向神都寒未還。要路何日罷長戟，戰自青羗連白蠻。中巴不得消息好，暝傳戍鼓長雲間。

秋風淅淅吹我衣，東流之外西日微。天清小城檣練急，石古細路行人稀。不知明月爲誰好，早晚孤帆他夜歸。會將白髮倚庭樹，故園池臺今是非。

追酬故高蜀州人日見寄

公自叙云開文書帙中檢所遺忘因得故

高常侍適往居在成都時高任蜀州刺史
人日相憶見寄詩淚灑行間讀終篇未自
枉詩已十餘年莫記存歿又六七年矣老
病懷舊生意可知今海內忘形故人獨漢
中王瑀與昭州敬使君超先在愛而不見
情見乎辭大曆五年正月二十一日却追
酬高公此作因寄王及敬策○時崔玠未
亂公在潭州時作

自蒙蜀州人日作不意清詩又零落今晨散帙眼忽
開迸淚幽吟事如昨嗚呼北土多慷慨合沓高名動

廖廓嘆我悽悽求友篇感時鬱鬱匡君畧錦里春光
空爛熳瑤墀侍臣已冥寞瀟湘水國旁鼉鼉鄆杜秋
天失鷓鴣東西南北更堪論白首扁舟病獨存遙拱
北辰纏寇盜欲傾東海洗乾坤邊塞西蕃最充斥衣
冠南渡多崩奔鼓瑟至今悲帝子曳裾何處覓王門
文章曹植波瀾濶服食劉安德業尊長笛誰能亂愁
思昭州詞翰與招魂

清明

大曆二年臧玠未反諸將亦事遊賞故公
作是詩

著處繁華矜是日長沙千人萬人出渡頭翠柳艷明
眉爭道朱蹄驕嚙膝此都好遊湘西寺諸將亦自軍
中至馬援征行在眼前葛疆親近同心事金鐙下山
紅日晚牙檣揆拖青樓遠古時喪亂皆可知人世悲
歡暫相遣弟姪雖存不得書干戈未息苦離居逢迎
少壯非吾道况乃今朝更祓除

清明二首

當是大曆四年公初至潭州作

朝來新火起新烟春色湖光淨客船繡羽衝花他自
得紅顏騎竹我無緣胡童結束還難有楚女腰肢亦
可憐不見定王城舊處長懷賈傅井依然虛霑焦舉
爲寒食實籍君平賣卜錢鍾鼎山林各天性濁醪麤
飯任吾年

此身飄泊苦西東右臂偏枯半耳聾寂寂繫舟雙下
淚悠悠伏枕左書空十年蹴鞠將雛遠萬里鞦韆習
俗同旅鴈上雲歸紫塞家人鑽火用青楓秦城樓閣
煙花裏漢主山河錦繡中風水春來洞庭濶白蘋愁
殺白頭翁

哀江頭

曲江在玄宗時爲京都勝賞之地遭祿山

焚劫之後荒涼太甚時公自賊中逃歸過此江頭有感故哀之也

必陵野老吞聲哭春日潛行曲江曲江頭宮殿鎖千門細柳新蒲為誰綠憶昔霓旌下南苑苑中萬物生顏色昭陽殿裏第一人同輦隨君侍君側輦前才人帶弓箭白馬嚼齧黃金勒翻身向天仰射雲一箭正墜雙飛翼明眸皓齒今何在血污遊魂歸不得清渭東流劍閣深去住彼此無消息人生有情淚霑臆江水江花豈終極黃昏胡騎塵滿城欲往城南忘南北

夜歸

在夔州作

夜來歸來衝虎過山黑家中已眠臥傍見北斗向江低仰看明星當空大庭前把燭噴雨炬峽口驚猿聞一箇白頭老罷舞復歌杖藜不睡誰能那

五言古

雷雨類

喜雨

永泰元年春大旱四月始雨七月又旱乃遣近臣錄囚蓋是年自春至秋多旱時公

在夔州

春旱天地昏，日色赤如血。農事都已休，兵戈况騷屑。
 巴人困軍須，慟哭厚土熱。滄江夜來雨，真宰罪一雪。
 穀根小蘇息，沴氣終不滅。何由見寧歲，解我憂思結。
 崢嶸羣山雲，交會未斷絕。安得鞭雷公，滂沱洗吳越。

大雨

按是年公有說早上嚴武云：今蜀自十月
 不雨，抵建卯月，非雪之時，柰久旱何？穀者
 百姓之本，百役是出。况冬麥黃枯，春種不
 入，公誠能暫輟諸務，疏決囚徒，使囹圄一
 空，必甘雨大降，但沴氣消，則和氣應矣。

西蜀冬不雪，春農尚嗷嗷。上天回哀眷，朱夏雲鬱陶。
 執熱乃沸鼎，纖絺成緼袍。風雷颯萬里，霖澤施蓬蒿。
 敢辭茅蕭漏，已喜黍豆高。三日無行人，二江聲怒號。
 流惡邑里清，矧茲遠江臯。荒庭步鸛鶴，隱几望波濤。
 沉疴聚藥餌，頓忘所進勞。則知潤物功，可以貸不毛。
 陰色靜壠畝，勸耕自官曹。四隣出耒耜，何必吾家操。

雨三首

大曆元年，公在夔州作。

峽雲行清曉，煙霧相徘徊。風吹蒼江去，雨灑石壁來。
 淒淒生餘寒，殷殷兼出雷。白谷變氣候，朱炎安在哉。

高鳥濕不下，居人門未開。楚宮久已滅，幽珮爲誰哀。
侍臣書王夢，賦有冠古才。冥冥翠龍駕，多自巫山臺。

其二

青山淡無姿，白露誰能數。片片水上雲，蕭蕭沙中雨。
殊俗狀巢居，曾臺俯風渚。佳客適萬里，沉思情延佇。
掛帆遠色外，驚浪滿吳楚。夕陰蛟螭出，寇盜復幾許。

其三

空山中宵陰，微冷先枕席。回風起清曉，萬象萋已碧。
落落出岫雲，渾渾倚天石。日假何道行，雨含長江白。
連檣荊州船，有士荷戈戟。南防草鎮慘，霑濕赴遠役。

羣盜下辟山，揔戎備疆敵。水深雲光廓，鳴櫓各有適。
漁艇息悠悠，夷歌負樵客。畱滯一老翁，書時記朝夕。
苦雨奉寄隴西公兼呈王徵士

隴西公卽漢中王瑀，王徵士卽瑯琊王徹。
天寶十三年苦雨潦，此詩當是其年作。

今秋乃淫雨，仲月來寒風。羣木水光下，萬家雲氣中。
所思礙行潦，九里信不通。悄悄素湓路，迢迢天漢東。
願騰六尺駒，背若征孤鴻。劃見公子面，超然歡笑同。
奮飛旣胡越，局促傷樊籠。一飯四五起，憑軒心力窮。
嘉蔬沒溷濁，時菊碎榛叢。鷹隼亦屈猛，烏鳶何所蒙。

式瞻北鄰居，取適南巷翁。掛席釣川漲，焉知清興終。

雨

永泰元年秋旱，公在雲安，明年方遷居夔

州。

行雲遞崇高，飛雨藹而至。潺潺石間溜，汨汨松上駛。
亢陽乘秋熱，百穀亦已棄。皇天德澤降，焦卷有生意。
前雨傷卒暴，今雨喜容易。不可無雷霆，間作鼓增氣。
佳聲達中宵，所望時一致。清霜九月天，髣髴見滯穗。
郊扉及我私，我圃日蒼翠。恨無抱甕力，庶減臨江費。

雨

大曆二年，公在夔州時，欲下峽入荆湘，明年遂行。是年吐蕃寇邠靈州，京師戒嚴。

山雨不作淫，江雲薄爲霧。晴飛半嶺鶴，風亂平沙樹。
明滅洲景微，隱見巖姿露。拘悶出門遊，曠絕經目趣。
消中日伏枕，臥久塵及屨。豈無平肩輿，莫辨望鄉路。
兵戈浩未息，虵虺反相顧。悠悠邊月破，鬱鬱流年度。
針灸阻朋曹，糠粃對童孺。一命須屈色，新知漸成故。
窮荒益自卑，飄泊欲誰訴。疋羸愁應接，俄頃恐違迂。
浮俗何萬端，幽人有高步。龐公竟獨往，尚子終罕遇。
宿留洞庭秋，天寒瀟湘素。杖策可入舟，送此齒髮暮。

喜晴

至德二年三月甲戌雨止後作

皇天久不雨，旣雨晴亦佳。出郭眺西郊，蕭蕭春增華。
青熒陵陂麥，窈窕桃李花。春夏各有實，我饑豈無涯。
干戈雖橫放，慘淡鬪龍蛇。甘澤不猶愈，且耕今未賒。
丈夫則帶甲，婦女終在家。力難及黍稷，得稷菜與麻。
千載商山芝，往者東門瓜。其人骨已朽，此道誰疵瑕。
英賢遇軼軻，遠引蟠泥沙。顧慙昧所適，回首白日斜。
漢陰有鹿門，蒼海有雲查。焉能學衆口，咄咄空咨嗟。

雷

永泰元年春旱至六月庚子始雨是年改

大曆元年公自雲安遷居夔州

大旱山嶽焦，密雲復無雨。南方瘴厲地，罹此農事苦。
封內必舞雩，峽中喧擊鼓。真龍竟寂寞，土梗空俯偻。
呀嗟公私病，稅歛缺不補。故老仰面啼，瘡痍向誰數。
暴尪或前聞，鞭巫非稽古。請先偃甲兵，處分聽人主。
萬邦但各業，一物休盡取。水旱其數然，堯湯免親覩。
上天鑠金石，羣盜亂豺虎。二者在一端，愆陽不猶愈。
昨宵殷其雷，風過齊萬弩。復吹霾翳散，虛覺神靈聚。
氣腸腸胃融，汗滋衣裳污。吾衰尤計拙，失望築場圃。

山河類

古律參互

望嶽

開元十五年公省親于兗州作

岱宗夫何如齊魯青未了造化鍾神秀陰陽割昏曉
盪曾生層雲决皆入歸鳥會當凌絕頂一覽衆山小

望嶽

大曆四年春晚公自潭州之衡州復返潭

州

南嶽配朱鳥秩禮自百王歛吸領地靈鴻洞半炎方
邦家用祀典在德非馨香巡守何寂寥有虞今則亡

洎吾隘世網行邁越瀟湘渴日絕壁出漾舟清光旁

祝融五峯尊峯峯次低昂紫蓋獨不朝爭長巖相望

恭聞魏夫人羣仙夾翱翔有時五峯氣散風如飛霜

牽迫限脩途未暇杖崇岡歸來覩命駕沐浴休玉堂

三歎問府主曷以贊我皇牲璧心衰俗神其思降祥

三川觀水漲二十韻

天寶十五載乙亥祿山陷京師公徒步避

寇鄜州三川縣時七月也以華池水黑源

水洛水同會謂之三川是詩公自白水縣

至華源自華源又至鄜州也

我經華原來不復見平陸北上惟土山連天走窮谷
火雲無時出飛電常在目自多窮岫雨行潦相逐感
翁旬川氣黃羣流會空曲清晨望高浪忽謂陰崖踣
恐泥窟蛟龍登危聚麋鹿枯查卷拔樹礧礧共充塞
聲吹鬼神下勢閱人代速不有萬穴歸何以尊四瀆
及觀泉源漲反懼江海覆漂沙折去岸激壑松栢禿
乘陵彼山門迴幹裂地軸交洛赴洪河入關豈信宿
應沉數州沒如聽萬室哭穢濁殊未清風濤怒猶蓄
何時通舟車陰氣不黷黷浮生有蕩汨吾道正羈束
人寰難容身石壁滑側足雲雷屯不已艱險路更蹶
普天無川梁欲濟願水縮因悲中林士未脫衆魚腹
舉頭向蒼天安得騎鴻鵠

奉同郭給事湯東靈湫作

靈湫水池名在驪山溫泉之東清徹可愛
龍所居也驪山在陝西臨潼縣去西安府
東七十里

東山氣濛鴻宮殿居上頭君來必十月樹羽臨九州
陰火煑玉泉噴薄漲巖幽有時浴赤日光抱空中樓
闔風入輒跡廣原延宴搜沸天萬乘動觀水百丈湫
幽靈新可佳王命官屬休初聞龍角壯擘石摧林丘

中夜窟宅改移因風雨秋倒懸瑤池影屈注蒼江流
未如甘露漿揮弄滑且柔翠旗淡偃蹇雲車紛少畱
簫鼓蕩四溟異香泱泱浮鮫人獻微綃曾祝沈豪牛
百祥奔盛明古先莫能儔坡陀金蝦蟆出見盖有由
至尊顧之笑王母不遣收復歸虛無底化作長黃虬
飄飄青瑱郎文采珊瑚鈎浩歌綠水曲清絕聽者愁

漢陂西南臺

漢陂在陝之西安府鄠縣陂魚甚美故曰
漢陂唐時禁採捕水則百姓灌溉之用天
寶十二載公未授官時作

高臺面蒼陂六月風日冷蒹葭離披去夫水相與永
懷新目似擊接要心已領仿像織鮫人空蒙辨漁艇
錯磨終南翠顛倒白閣影首萃增光輝乘凌惜俄頃
勞生愧嚴鄭外物慕張邴世復輕驂騶吾甘雜鼃鼃
知歸俗可忽取適事莫並身退豈待官老來苦便靜
况脊菱茨足庶結茅茨迥從此具扁舟彌年逐清景

南池

公以廣德元年秋往闈冬回梓明年春又
之闈時廣德元年秋也

崢嶸巴閬間所向盡山谷安知有蒼池萬頃浸坤軸

呀然闔城南，枕帶巴江腹。菱荷入異縣，粳稻共比屋。
皇天不無意，美利戒止足。高田失西成，此物頗豐熟。
清源多衆魚，遠岸富喬木。獨歎楓香林，春時好顏色。
南有漢工祠，終朝走巫祝。歌舞散靈衣，荒哉舊風俗。
高堂亦明王，寬魄猶正直。不應空陂上，縹緲親酒食。
淫祀自古昔，非惟一川瀆。干戈浩茫茫，地僻傷極口。
平生江海興，遭亂身局促。駐馬問漁舟，躊躇慰羈束。

萬丈潭

名鳳凰潭，在同谷縣。今陝西鞏昌府成縣是也。此詩當是乾元二年，公自秦之同谷。

時作

青溪合冥寞，神物有顯晦。龍依積水蟠，窟壓萬丈內。
跼步凌垠堦，側身下煙靄。前臨洪濤寬，却立蒼石大。
山危一徑盡，岸絕兩壁對。削成根虛無，倒影垂澹瀨。
黑知灣濶底，清見光炯碎。孤雲倒來深，飛鳥不在外。
高蘿成帷幄，寒木疊旌旆。遠川曲通流，嵌竇潛流瀨。
造幽無人境，發興自我輩。告歸遺恨多，將老斯遊最。
閉藏脩鱗螬，出入巨石礙。何事炎天過，快意風雲會。

泛溪

溪卽浣花溪也。上元元年秋晚作。是時公

已居溪上

落景下高堂，進舟泛迴溪。誰謂築居小，未盡喬木西。
遠郊信荒僻，秋色有餘凄。練練峯上雪，纖纖雲表霓。
童戲左右岸，罟弋畢提攜。翻倒荷芰亂，指揮逕路迷。
得魚已割鱗，採藕不洗泥。人情逐鮮美，物賤事已睽。
吾村靄暝姿，異舍雞亦棲。蕭條欲何適，出處庶可齊。
永上見新月，霜中登故畦。濁醪自初熟，東城多鼓鼙。

溪漲

溪卽浣花溪也

當時浣花橋，溪水纔尺餘。白石明可把，水中有行車。

秋夏忽泛溢，豈惟入吾廬。蛟龍亦狼狽，况是鼈與魚。
茲晨已半落，歸路跬步踈。馬嘶未敢動，前有深填淤。
青青屋東麻，散亂床上書。不意遠山雨，夜來復何如。
我遊都市間，晚憇必村墟。乃知久行客，終日思其居。

太平寺泉眼

太平寺在陝西鞏昌府秦州

招提憑高岡，疎散連草萊。出泉枯柳根，汲引歲月古。
石間見海眼，天畔縈水府。廣深丈尺間，宴息敢輕侮。
青白二小蛇，幽姿可時覩。如絲氣或上，爛熳爲雲雨。
山頭到山下，鑿井不盡土。取供十方僧，香美勝牛乳。

北風起寒文，弱藻舒翠縷。明涵客衣淨，細蕩林影趣。
何當宅下流，餘潤通藥圃。三春濕黃精，一食生毛羽。
臨邑舍弟書至，苦雨黃河泛溢，隄防之患，簿領所憂，因寄此詩，用寬其意。

臨邑縣名屬今山東濟南府，開元二十九年七月伊洛及支州皆溢，是秋河南河北二十四郡水。臨邑其一也。伊洛二水隸河南府，時公弟穎爲臨邑縣主簿，公詩當是作于其秋。

二儀積風雨，百谷漏波濤。聞道洪河折，遙連滄海高。
職司憂悄悄，羣國訴嗷嗷。舍弟卑棲邑，防川領簿曹。
尺書前日至，版築不時操。難假黿鼉力，空瞻烏鵲毛。
燕南吹畎畝，濟上沒蓬蒿。螺蚌滿近郭，蛟螭乘九臯。
徐關深水府，碣石小秋毫。白屋留孤樹，青天失萬艘。
吾衰同泛梗，利涉想蟠桃。倚賴天涯釣，猶能掣巨鰲。

天池

在四川夔州府巫山縣

天池馬不到，嵐壁鳥纔通。百頃青雲杪，曾波白石中。
鬱紆騰秀氣，蕭瑟浸寒空。直對巫山出，兼疑夏禹功。
魚龍開闢有，菱芡古今同。聞道奔雷黑，初看浴日紅。

飄零神女雨，斷續楚王風。吹問支機石，如臨獻寶宮。
九秋驚鴈序，萬里狎漁翁。更是無人處，誅茅任薄躬。

都城類

園亭附

古律參五

建都十二韻

上元元年初建五都二年停止寶應元年
復建以京兆府爲上都河南府爲東都鳳
翔府爲西都江陵府爲南都太原府爲北

都

蒼生未蘇息，胡馬半乾坤。議在雲臺上，誰扶黃屋尊。
建都分魏闕，下詔闢荆門。恐失東人望，其如西極存。

時危當雪耻，計大豈輕論。雖倚三階正，終愁萬國翻。
牽裾恨不死，漏網辱殊恩。永負漢廷哭，遙憐湘水冤。
窮冬客江側，隨事有田園。風斷青蒲節，霜埋翠竹根。
衣冠空穰穰，關輔久昏昏。願枉長安日，光輝照北原。
江陵望幸

江陵今湖廣荊州府時建爲南都望幸望
車駕來幸也廣德元年吐蕃入寇代宗幸
陝以衛伯玉有幹畧可當方向任大事乃
拜荊南節度使意是時代宗有意幸江陵
故公有此作陝州今隸河南府

雄都元壯麗，望幸歛威神。地利西通蜀，天文北照秦。
風煙含越鳥，舟楫控吳人。未枉周王駕，終期漢武巡。
甲兵分聖旨，居守付宗臣。早發雲臺仗，恩波起涸鱗。

南極

南極星名，晉天文志：南極老人星在井柳之間，井星爲四川分野。時公在夔州，故云。

南極

南極青山衆，西江白谷分。古城踈落木，荒戍密寒雲。
歲月蛇常見，風飈虎忽聞。近身皆鳥道，殊俗自人羣。
睥睨登哀柝，蜚弧照夕曛。亂離多醉尉，愁殺李將軍。

西閣曝日

大曆元年時公居于西閣

凜冽倦玄冬，負暄嗜飛閣。羲和流德澤，顓頊愧倚薄。
毛髮具自和，肌膚潛沃若。太陽信深仁，衰氣歛有託。
歛傾煩注眼，容易收病脚。流離木杪猿，翩躚山巔鶴。
朋知苦聚散，哀樂日已作。卽事會賦詩，人生忽如昨。
古來遭喪亂，賢聖盡蕭索。胡爲將暮年，憂世心力弱。
水閣朝霽奉簡雲安嚴明府

雲安今夔州府雲陽縣嚴武嘗官於此故
云嚴雲安時公大曆元年在夔州作

東城抱春岑，江閣鄰石面。崔嵬晨雲白，朝日射芳甸。
雨檻臥花叢，風牀展書卷。鈎簾宿鷺起，丸藥流鶯轉。
呼婢取酒壺，續兒誦文選。晚交嚴明府，矧此數相見。

晚登灤上堂

大曆二年三月，公自赤甲遷居灤西時作。

灤西在今夔州府城東地，高可以登眺。

故躋灤岸高，頗免崖石擁。開襟野堂豁，繫馬林花動。
雉堞粉如雲，山田麥無隴。春氣晚更生，江流靜猶湧。
四序嬰我懷，羣盜久相踵。黎民困逆節，天子渴垂拱。
所思注東北，深峽轉脩聳。衰老自成病，郎官未為冗。

悽其望呂葛，不復夢周孔。濟世數嚮時，斯人各枯冢。

楚星南天黑，蜀月西霧重。安得隨鳥翎，迫此懼將恐。

上白帝城二首

白帝山在夔州府城東五里峽中，視之孤

特甚峭北緣馬嶺，接赤甲山。公孫述據蜀

殿前井中嘗有白龍出，因稱白帝山，亦以

名

江城含變態，一上一回新。天欲今朝雨，山歸萬古春。

英雄餘事業，衰邁久風塵。取醉他鄉客，相逢故國人。

兵戈猶擁蜀，賦斂尚輸秦。不是煩形勝，深慙畏損神。

其二

白帝空祠廟，孤雲自往來。江山城宛轉，棟宇客徘徊。
勇畧今何在，當年亦壯哉。後人將酒肉，虛殿日塵埃。
谷鳥鳴還過，林花落又開。多慙病無力，騎馬入青苔。

陪諸公上白帝城樓宴越公堂之上

越公楊素也。有堂在城上，畫像尚存。大曆

元年作。

此堂存古制，城上俯江郊。落構垂雲雨，荒堦蔓草茅。
柱穿蜂溜蜜，棧缺燕添巢。坐接春盃氣，心傷艷蕊梢。
英靈如過隙，宴衍願投醪。莫問東流水，生涯未卽拋。

陪章叅後侍御宴南樓

按唐時節度使有屬官叅後，長慶間叅後
改爲知院官。初章彝爲嚴武叅後，最見親
厚。廣德二年，嚴武再鎮成都，小不副意，召
赴成都殺之。先是廣德元年夏末，與公宴
于南樓，故有此作。

絕域長夏晚，茲樓清宴同。朝廷燒棧北，鼓角漏天東。
屢食將軍第，仍騎御史驄。本無丹竈術，那免白頭翁。
寇盜狂歌外，形骸痛飲中。野雲低度水，簷雨細隨風。
出號江城黑，題詩蠟炬紅。此身醒復醉，不擬哭途窮。

送嚴侍郎到綿州同登杜使君江樓宴

寶應元年夏嚴武赴召東上公送之別於
巴西綿州今屬成都府

野興每難盡江樓延賞心歸朝送使節落景惜登臨
稍稍煙集渚微微風動襟重船依淺瀨輕鳥度層陰
檻峻背幽谷窻虛交茂林燈光散遠近月彩靜高深
城擁朝來客天橫醉後參窮途衰謝意苦調短長吟
此會共能幾諸孫賢至今不勞朱戶閉自待白河沉

西閣二首

大曆元年八公寓夔州西閣作

巫山小搖落碧色見松林百鳥各相命孤雲無自心
層軒俯江壁要路亦高深朱紱猶紗帽新詩近玉琴
功名不早立衰疾謝知音哀世非王粲終然學越吟

其二

懶心似江水日夜向滄洲不道含香賤其如鑷白休
經過凋碧柳蕭瑟倚朱樓畢娶何時竟消中得自由
豪華看古往服食寄冥搜詩盡人間意兼須入海求

陪鄭公秋晚北池臨眺

公在嚴武幕中自遣悶有作奉呈後與之
咏竹泛舟觀岷沱圖及陪北池臨眺皆分

韻賦詩武若銜而欲殺之豈復情分還密
如此不知史何所本而云

北池雲水濶華館闢秋風獨鶴元依渚衰荷且映空
采菱寒刺上踏藕野泥中素楫分曹往金盤小徑通
萋萋露草碧片片晚旗紅盃酒霑津吏衣裳與釣翁
異方初豔菊故里亦高桐搖落關山思淹留戰伐功
嚴城殊未掩清宴已知終何補參軍乏歡娛到薄躬
奉和嚴中丞西城晚眺十韻

寶應元年嚴武至成都公和此詩

汲黯匡君切廉頗出將頻直詞才不世雄畧動如神
政簡移風速詩清立意新層城臨媚景絕域望餘春
旗尾蛟龍會樓頭燕雀馴地平江動蜀天濶樹浮秦
帝念深分闡軍須遠笑緡花羅封蛺蝶瑞錦送麒麟
辭第輪高義觀圖憶古人征南多興緒事業間相親
陪李北海宴歷下亭

李北海卽李邕天寶初邕爲汲郡北海太
守嘗過齊州與公宴於歷下亭時天寶四
載間也汲郡今之河南衛輝府汲縣北海
郡今之山東濟南府歷下亭今在濟南歷
陽縣其縣歷山卽舜所耕之地故以名亭

在今府城之內

東藩駐阜蓋北渚凌清河海右此亭古濟南名士多
雲山已發興玉佩仍當歌脩竹不受暑交流空湧波
蘊真愜所遇落日將如何貴賤俱物役從公難重過
同李太守登歷下古城員外新亭

亭對鵲湖鵲在歷下亭之南

新亭結構罷隱見清湖陰跡籍臺觀舊氣溟海嶽深
圓荷想自昔遺堞感至今芳宴此時具哀絲千古心
主稱壽尊客筵秩宴北林不阻蓬筍興得兼梁父吟
阻雨不得歸灤西夔其林

大曆元年夏公初夔州作

三伏適已過驕陽化爲霖欲歸灤西宅阻此江浦深
壞舟百板坼峻岸復萬尋篙工初一弃恐泥勞寸心
佇立東城隅悵望高飛禽草堂亂玄圃不隔崑崙岑
昏渾衣裳外曠絕同層陰園其長成時三寸如黃金
諸侯舊上計厥貢傾千林邦人不足重所迫豪吏侵
客居暫封植日夜偶瑤琴虛徐五株態側塞煩曾襟
焉得輟雨足杖藜出嶇嶮條流數翠實偃息歸碧潯
拂拭烏皮几喜聞樵牧音令兒快搔背脫我頭上簪

其林

大曆三年吐蕃寇近畿郭子儀屯涇陽京
師戒嚴故公自東屯移居瀼西

捨舟越西岡入林解我衣青芻適馬性好鳥知人歸
晨光映遠岫夕露見日晞遲暮少寢食清曠喜荆扉
經過倦俗態在野無所違試問其藜藿未肯美輕肥
喧靜不同科出處各天機勿矜朱門是陋此白屋非
明朝步鄰里長老可以依時危賦歛數脫粟爲爾揮
相攜行豆田秋花藹菲菲子實不得喫貨市送王畿
盡添軍旅用迫此公家威主人長跪辭戎馬何時稀
我思易悲傷屈指數賊圍勸其死王命慎莫遠奮飛

將別巫峽贈南卿兄瀼西果園四十畝

南卿南姓卿者大夫之尊稱大曆三年正

月作

苔竹素所好萍蓬無定居遠遊長兒子幾地別林廬
雜蘂紅相對他時錦不如具舟將出峽巡圃念携鋤
正月喧鶯未茲晨放鷓初雪籬梅可折風榭柳微舒
託贈卿家有因歌野興疎殘生逗江漢何處狎樵漁

園人送瓜

時柏貞節爲中丞守夔州公爲柏都督遣
園人送官瓜干公

江間雖炎瘴瓜熟亦不早柏公鎮夔國滯務茲一掃
食新先戰士共少及溪老傾筐蒲鴿青蒲眼顏色好
竹竿接嵌竇引注來鳥道沉浮亂水玉愛惜如芝草
落刃嚼水霜開懷慰枯稿許以秋蒂除仍看小童抱
東陵跡蕪絕楚漢休征討園人非故侯種此何草草
遭田父泥飲美嚴中丞

時公結廬成都府浣花里與田峻野老相
狎蕩巖中丞嚴武也與公爲故舊時拜成
都尹兼御史大夫泥飲謂飲醉如泥也

步屨隨春風村村自花柳田翁逼社日邀我嘗春酒

酒酣誇新尹畜眼未見有迴頭指大男渠是弓弩手
名在飛騎籍長番歲時久前日放營農辛苦救衰朽
差科死則已誓不舉家走今年大作社拾遺能住否
叫婦開大瓶盆中爲吾取感此氣揚揚須知風化首
語多雖雜亂說尹終在口朝來偶然出自卯將及酉
久客愔人情如何拒鄰叟高聲索果栗欲起時被肘
指揮過無禮未覺村野醜月出遮我畱仍嗔問升斗
鄭駙馬池臺喜遇鄭廣文同飲

鄭駙馬名潛曜尚臨晉公主廣文名虔駙
馬乃虔之姪也池臺在河南府新安縣此

詩作于至德二年王敦尚襄城公主拜駙馬都尉說文駙近也以其近于帝之馬也

不謂生戎馬何知共酒盃燃臍郿塢敗握節漢臣回
白髮千莖雪丹心一寸灰別離經死地披寫忽登臺
重對秦簫發俱過阮宅來畱連春夜舞淚落強徘徊

七言古

陰雨類

愁雨嘆二首

玄宗天寶十三載秋大霖雨六旬不止帝
憂之楊國忠取禾之善者以獻曰雨雖多

不害稼此詩刺時之暴虐君子不見容于
朝蓋當泛言之不必指定張九齡李林甫
也

雨中百草秋爛死堦下決明顏色鮮著葉滿枝翠羽
蓋開花無數黃金錢涼風蕭蕭吹汝急恐汝後時難
獨立堂上書生空白頭臨風三嗅馨香泣

闌風伏雨秋紛紛四海八荒同一雲去馬來牛不復
辨濁涇清渭何當分禾頭生耳黍穗黑農夫田父無
消息城中斗米換衾裯相許寧論兩相直

長安布衣誰比數反鑣衙門守環堵老夫不出長蓬

木言分數 卷之二 三草六
篙稚子無憂走風雨雨聲颼颼催早寒胡鴈翅濕高
飛難秋來未曾見白日泥汚后土何時乾

晚晴

此詩大曆二年冬在夔州作

高唐暮冬雪壯哉舊瘴無復似塵埃崖沉谷沒白皚
皚江石缺裂青楓摧南天三旬苦霧開赤日照曜從
西來六龍寒急光徘徊照我衰顏忽落地口雖吟咏
心中哀未怪及時少年子揚眉結義黃金臺汨乎吾
生何飄零支離委絕同死灰

復陰

同是大曆二年冬作詩云昨日晚晴今日

黑晚晴即前所賦之詩也

方冬合沓玄陰塞昨日晚晴今日黑萬里飛蓬映天
過孤城樹羽揚風直江濤歎岸黃沙走雲雪埋山蒼
兕吼君不見夔子之國杜陵翁牙齒半落左耳聾

丈人山

山在四川成都府灌縣此山爲五嶽之長
故名丈人山其上有丈人觀

自爲青城客不唾青城地爲愛丈人山丹梯近幽意
丈人祠西佳氣濃緣雲礙住最高峯掃除白髮黃精

在君看他時冰雪容

寒雨朝行視園樹

園乃灤西之園此詩當是大曆二年冬作
柴門雜樹向千株丹橘黃甘此地無江上今朝寒雨
歇籬中秀色畫屏紆桃蹊李徑年雖故梔子紅椒豔
色殊鑠石藤稍元自落到天松骨見來枯林香出實
垂將盡葉蒂辭枝不重蘇愛日恩光蒙借貸清霜殺
氣得憂虞衰顏動覓藜床坐緩步仍須竹杖扶散騎
未知雲閣處啼猿僻在楚山隅

陪王侍御同登東山最高頂宴姚通泉晚携

酒泛江

東山在通泉縣通泉今四川州射洪縣是
也此詩乃寶應元年十一月公至通泉時
作

姚公美政誰與儔不減昔時陳太丘邑中上客有柱
史多暇日陪驄馬遊東山高頂羅珍羞下顧城郭銷
我憂清江白日落欲盡復携美人登綵舟笛聲憤怒
哀中流妙舞逶迤夜未休燈前往往大魚出聽曲低
昂如有求三更風起波浪湧取樂喧呼覺船重滿空
星河光破碎四座賓客色不動請公臨深莫相違迴

船罷酒上馬歸人生歡會豈有極無使霜露霑人衣

杜詩分類

卷之三

十四

林百九

杜詩分類卷之一終



船罷酒上馬歸人生歡會豈有極無使霜露霑人衣

杜詩分類卷之二



